

# ጳውሎስ አሮሜ አሳስ ፃፊ ኪታ ጊዶ ቆፋ

ሃዋሬ ጳውሎስ ኪታይ አሮሜ አሳስ ፃፊው ጳውሎስ አሮሜን ዲዛ ዎሳ ኬሳዮ ጋኪ ቤያናስ ቆፒዳ ጊሽ ኢስቲ ኢዛ ጊጌቲ ናጋና ማላ ኤሪሳናሲኮ። ጳውሎስ ዲዛ ቆፋይ አሮሜን ዲዛ አማኒዛ አሳራ ጉሳ ዎዴ አሲዳፔ ጉዬ ኢስቲ ኢዛ ማዲኮ ኢዚ ጌዴ ኢስፔኔ ቢታ ባናስኮ። ኢዚ ባሲ ጌሊዳ ማላ ኢስታስካ አማኖይ ጌሊን አማኒዛይቲ ባ ዱሳን አማኖ ቤሳና ማላ አማኖ ቲሚርቴ ሃኖ ኢስታስ ወርሲ ቢርሺ ፃፊዎ። ጳውሎስ ኪታይ ኩሜስ ጊዲ ቤቲዳይ ሃይሳ ሃ ኪታዛኒኮ።

ጳውሎስ አሮሜን ዲዛ አማኒዛ አሳስ ባ ሳሮካ ዩዲዳፔኔ ኢስታስ ኢዚ ዎሳና ቃላ ጌሊዳፔ ጉዬ ባ ኪታስ ዋና አይፌ ዮዎ (1:17) “ዎሳፊ ቤቲዛ ጊሎቴስ አማኖኔ አማኖስ ጊዲዳ ማላ ሚሺራሾ ቃላን ቆንጨዴስ” ጊዛ ቃላ ጊዲዳይሳ ቤሴስ።

ሄሳፊ ጉዬ ጳውሎስ ሃይሳ ሃ ቆፋዛ ጉጂ አሲ ፃፊ። አይሁዳታካ ጊዲን ዎይኮ ሃንኮ ዴሬ አሳ ጊዲን አሲ ወሪካ ናጋራስ ሃራቲዳ ጊሽ ዎሳራ ኢጊንታናስ ቤሴስ። አሳይ ዎሳራ ኢጊንታናስ ዳንዳዩዛይ ዩሱስ ኪርስቶሳን አማኖና። ሄሲ አሳይ ዎሳራ ዶሚዳ አራሳ ኢሲፊቴሳ አይፊይ አራሳ ዴዎ ጊዲዳይሳ ጳውሎስ ሎዔሲ ኤሪሴስ። አማኒዛዴይ ዎሳራ ሳሮን ዴዔስ፤ ዎሳ አያና ባጋራ ሄሳዴይ ናጋራፔኔ ሃይቆ ዎልቃፊ ዎዜቴስ፤ ሺምፖ 5-8 ጋካናስ ጳውሎስ ዎሳ ዎጋ ጊሺኔ አማኒዛይታ ዴዎን አሲዛ ዎሳ ጊሎ አያናስ ቆፋይ አዛኮኔ ቆንጨሴስ። ቃሴካ ጉጂዲ ጳውሎስ “አሳ ዜሬሳ ጊሽ ዎሳስ ዲዛ ቆፋ ጊዶን አይሁዳይኔ አይዛቤይ ኢሲፊ አይኬታናስ ዳንዳዩዜ?” ጊዛ አይሾስ ዛሮ ኢማናስ ባፄቴስ።

ቃሴካ ጳውሎስ ቆንጨሲዳ ማላ አይሁዳቲ ዩሱስ አማኖንታ አቲዳይ ዎሳ ቆፋ ማላ። ሄሲካ ሃኒዳይ ዩሱስ ኪርስቶሳ ባጋራ ዎሲ ቆንጨሲዳ ኢዛ አቶቴሳ ኪያን ኩሜስ አሳ ዜሬሲ ወሪካ ጋኪ ኤካና ጋሳናሳ። ጊዶ አቲን አይሁዳ አሳይ ዩሱሳን አማኖና ዎዴይ ያናይሳ ጳውሎስ አማኔስ። ወርሴሳን ጳውሎስ አማኖን ዋኒ ዴያናኮኔ ሃራፔካ አማኒዛይቲ ባ ጋርሳን ባሲ ዲዛ ጋይቶቴሳን ሲቆ አጌ ካሳናስ ቤሲዛይሳ ኢስታ ኤሪሴስ። ጉጂዲካ ኢስታስ ዎሳ አሶ ጊሽ አማኒዛይቲ ባ ዴሬ ጊሽ፣ ባ ጋርሳን ኢሶይ ኢሳ

ናጋናስ ቤሲዛ አላፌቴሳ ጊሺኔ ቆፋፔ ዴንዲዛ አይሻታ ወርሲ ሁዔን ሁዔን ኤሪሴስ።

- ሃ ማፃፋይ አይኪዳ ኩሜሳ ቆፋ
- ሃ ማፃፋዚ አይኪዳ አይፌ ቆፋታ 1: 1-17
- አሳ ናስ አቶቴሲ ኮሺስ 1: 18-3: 20
- ዖሲ አሳ ና አሺዛ አጌ 3: 21-4: 25
- ኪርስቶሳ ባጋራ ቤተዛ አራሳ ዴዖ 5: 1-8: 39
- ኢስራዔል አሳይ ዖሳ ቆፋ ጋርሳን 9: 1-11: 36
- አማኒዛ አሳ ሎዖ አሶ 12: 1-15: 13
- ወርሴሳ ሳሮካ 15: 14-16: 27

1 ዮሱስ ኪርስቶሳ አይሌኔ ሃዋሬ ጊዳናስ ዌይጌቴዳ ሚሺራቾ ቃላ ዮታናስ ጳውሎሳፔ ኪቴቴዳ ኪታ።

2 ሄ ሚሺራቾ ቃላ ጊሽ ካሴ ናቤታ ባጋራ ጌሻ ማፃፋታን ኡፋይሲ ኢሜቴዴስ። 3 ሚሺራቾ ቃላይካ ባ ናዛ ጊሽ ኢዚ አሾ ባጋራ ዳወቴ ዜሬሳፌ ጊዲዳይሳ ዮተዛ ጊሻሳ። 4 ሄሳሶካ ኑ ጎዳ ዮሱስ ኪርስቶሲ ባ ጌሻቴሳ አያናን ሃይቆፔ ዴንዲዳይሲ ኢዚ ዖሳ ና ጊዲዳይሲ ጊታ ዎልቃን ቆንጨዴስ። 5 ኪርስቶሳ ሱንሳ ጊሽ አማኖንታ ዴሬይ አማናና ማላኔ አዛዜታና ማላ ኢዛ ባጋራ ኑኒ ሃዋራቴሳስ ጋሲዛ ኪያቴስ ኤኪዶስ። 6 ኢንቴካ ዮሱስ ኪርስቶሳይታ ጊዳና ማላ ዌይጌቴዳይታራ ዴታ።

7 ዖሳን ዶሴቴዳይታኔ ጌሻታ ጊዳናስ ዌይጌቴዳ አሮሜ ቤታን ዲዛ ኢንቴስ ኡባስ ኑ አዎ ዖሳፌኔ ኑ ጎዳ ዮሱስ ኪርስቶሳፔ ኪያቴሲኔ ሳሮቴሲ ኢንቴስ ጊዶ።

**ጳውሎሲ አሮሜ ቤያና ላሞቴዴስ**

8 ኢንቴ አማኖይ አሳሜ ኩሜሳን ሲዮቴዳ ጊሺኔ ኢንቴ ጊሽ ታ ጎዳ ዖሳ ዮሱስ ኪርስቶሳ ባጋራ ጋላታይስ። 9 ታ ኢንቴ ጊሽ ኡባ ዎዴ አይ ማላ ቆፒዛኮኔ ዖሳ ና ሚሺራቾ ሳባኮን ታ ኩሜሳ ዎዝናፔ ኢዛስ አሲዛ ዖሳይ ታስ ማርካ። 10 ታኒ ታ ዎሳን ኡባ ዎዴ ኢንቴና ቆፓይስ። ሃዒ ቃሴ ወርሴሳን ዖሳ ሺኔ ጊዲኮ ታ ኢንቴኮ ባና ማላ ዖሲ ታስ አጌ ዶያና ማላ ዎሳይስ። 11 ኢንቴ ሚናና ማላ ማዲዛ አያና ኢሞቴሲ ታ ኢንቴስ ጊሻናሲኔ ኢንቴና አይፌራ ቤያናስ ላሞታይስ። 12 ሄሲካ ኢንቴኔ ታኒ ኢሶይ ኢሳራ አማኖን ሚኔታናሳ።

13 ታ ኢሻቶ! ሃራሶን አማኖንታይታ ማታን ታስ ሃኒዳ ማላ ኢንቴ ማታንካ ታስ አሶ አይፌይ ቤታና ማላ ዳሮ ዎዴ ቆፓዲስ ሺን ሃኖ ጋካናስ ታ ዲጌታዳ ዲዛይሳ ኢንቴ ኤራና ማላ ኮያይስ።

\* 14 ታማሪዳይታስ ጊዲን ታማሮንታይታስካ፤ ኡራታሲኔ ኡያታስ ኡባስ ታ ቦላ ታማርሳና አጮይ ዴስ። 15 ኢንቴስ አሮሜን ዲዛይታሲካ ታ ሚሺራቾ ቃላ ዮታናስ ታ አሞቲዛይ ሄሳሳ።

16 አማንዛይቲ ዉሪ አታና ማላ ያሳ ምልቃ ጊዲዳ ጊሽ ታ ሚሺራቾ ቃላን ዩላቲኬ፤ ሄሲካ ኮይሮ አይሁዳታስ ካሊዲ አይዛቤታሳ። \* 17 “ዒሎይ ያሳ አማኖን ዴስ” ጌቲቲዲ ካሴ ገፌቲዳ ማላ ያሳ ዒሎቴሌ ሚሺራቾ ቃላን ቆንጨና፤ ሄ ዒሎቴሌ ኮይሮፕ ዉርሴስ ጋካናስ አማኖን ሃናና። \*

**አሳ ናይታ ኢታቴስ**

18 ቱማ ባ ኢታቴሳኒኔ ማካላን ቱጨ አይኪዛይታ ኢታቴሳ ቦላኔ ኢስታ ማካላቴሳ ኡባ ቦላ ያሳ ሃንቆይ ሳሎፕ ቆንጫና።

19 ኢስቲ ኡራናስ ቤሲዛዚ ያሲ ዉርሲ ኢስታስ ቆንጨሲዳ ጊሽ ኢስቲ ያሴ ኡራናስ ቆንጩ። 20 አላሜይ ሜዴቶሶፕ ሃ ሲሚን አሳ አይፌን ቤቲ ኡሮንታ ያሳ ሃኖቴሌ ሄሲካ ኢዛስ ዲዛ ሜርና ምልቃይኔ ያሳቴሳይ ኢዚ ሜዲዳ ሜዴቴሳን ቆንጩን ቤቱስ። ሄሳ ጊሽ አሳይ ሺሻና ጋሶይ ዴና። 21 ኢስቲ ያሴ ኡሪኮካ ኢዛ ያሳቴሳ ማላ ቦንቺቤቴናኔ ጋላቲቤቴና። ጊዶ አቲን ኢስታ ቆፋይ ሜላ ጎዓይ ባይንዳዚ ጊዲዴሲኔ ዩሺ ቆፖንታ ማላ ኢስታ ምዝናይ ዲሚዴስ። \* 22 ኢስቲ ባና “ኡራ” ጊዛይታ ጊዲኮካ ኡያታ ጊዲዳ። 23 ሜርና ያሳ ቦንቾ ሃይቂዛ አሳኒኔ ካፎታን፤ ሜሄታኒኔ ቢታ ቦላ ጎሼቲዛ ሜዴቴሳታን ሚሳቲሲዲ ላሚዳ። \*

24 ሄሳ ጊሽ ያሲ ኢስታ ባ ጊዶን ኢሶይ ኢሳራ ባርካ ባ አሳቴሳን ቱና አሶ አሳና ማላ ጌሻቴሌ ባይንዳ ሳይማቴሳስ አሲ ኢሚዴስ። 25 ኢስቲ ያሳ ቱማቴሌ ምርዶን ላሚዳ፤ ሜዲዳ ያሳ አጊዲ ሜዴቴሳስ ጎይኒዳኔ ኢስታስ አሲዳ። ሜዲዳ ያሲ ኢዚ ሜርናስ ጋላቴቲዳይሳ። አሚን።

26 ሄሳ ጊዶን ያሲ ኢስታ ዩላቺዛ አሞቴሳስ አሲ ኢሚዴስ። ኢስቲ ማጫሳቲ ባናራ ዚንዓናስ ቤሶንታይታራ ዚንዓና ማላ ባና አሲ ኢሚዳ። 27 ሄሳሶካ አቱማ አሳይ ባሲ ቤሲዛ ማጫሳታራ ዚንዓናስ ቤሲሺን አዴይ አዴራ ዚንዓናስ አሞን ፀጌቲዲ ማጫሳታራ ዚንዒዛ ማላ አዴይ አዴራ ዚንዒዲ ፓላ ሚሺ አሲዳ። ሄይታንቲ ባርካ ባ አሲዳ ኢታ አሶዛስ ቤሲዛ ቂዓቴ ባ ቦላ ኡሂዳ።

28 ቃሴካ ኢስቲ ባ ቆፋራ ያሴ ኡሮይ ኑና ማዴና ጊዳ ጊሽ ኢስቲ አሳናስ ቤሶንታይሳ አሳና ማላ ያሲ ኢስታ ጎምንታ ቆፋስ አሲ ኢሚዴስ። 29 ኡባ ባጋራ ማካላኔ ኢታቴሌ፤ ዩቄኔ ኢታ አሶን

\* 1:13 ሃዋ 19:21 \* 1:16 ማር 8:38 \* 1:17 ኢብ 2:4 \* 1:21 ኡፌ 4:17-18 \* 1:23 ዛሬ 4:16-18

ፃላላ ኩሚዳ፤ ቃናቴቴላን፤ ሼምፖ ዎድን፤ አሻን፤ ባሌሶኒኔ ጌኔን ኩሚዳይታ ቃሴካ ዚጊርዛይታ ጊዲዳ።<sup>30</sup> አሳ ሱንጸ ሞሪዛይታ፤ ሶሳ ኢጊዛይታ፤ አስ ጫይዛይታ፤ አቶራንቻታኔ ጩቁቲዛይታ ጊዲዳ፤ ኡባ ዎዴ ኢታ አሳናስ አጌ ኮዩዛይታ፤ ባና ዩሊዳይታስ አዛዜቶንታይታ፤<sup>31</sup> ዩሺ ቆፖንታይታ፤ ጊዳ ቃላ ዛሪ ላሊዛይታ፤ አሳስ ሚሼቶንታይታ፤ ሜንጻ ኢታታ።<sup>32</sup> ሄሳ “አሲዛይቲ ዉሪካ ሃይቃናስ ቤሴስ” ጊዛ ሶሳ ዎጋ ኢስቲ ኤሪሼ ሄይታንታ ባሲ አሶ ፃላላ ጊዶንታ ሄሳሶካ አሲዛይታካ ሚንፊሴቴስ።

2

ሶሳ ፐርዳ

<sup>1</sup> ሄሳ ጊሽ ኔኖ ሃራ ቦላ ፐርዲዛይሶ ኔኒ ታ ሃኒ ጌዶን አሳዲስ ጊዛ ጋሶይ ኔስ ደና። ኔ ሃራ አሳ ቦላ ፐርዲዛይሳን ኔርካ ኔስ ኩናኔ ኤካሳ። ጋሶይካ ሃራ አሳ ቦላ ኔ ፐርዲዛይሳ ኔካ ዛራዳ ኢዛ አሲዛ ጊሻሳ። \* <sup>2</sup> ሃይታ ማላታ አሲዛ አሳታ ቦላ ሶሳ ፐርዳይ ሊኬ ጊዲዳይሳ ኑ ኤሮስ። <sup>3</sup> ሄሳ ጊሽ ኔ አሳ ቦላ ፐርዳሼ ሄ ኔ ፐርዲዛይሳ ዛራ አሲዛዴ ጊዲኮ ኔ ሶሳ ፐርዳፌ ኬሳ ኤካ አታና ኔስ ሚሳቲዜ? <sup>4</sup> ዎይኮ ሶሳ ኪያቴስ ኔና ማሮቴሳኮ ካሌሲዛይሳ ሻካ ኤሮንታ ዳሼ ኢዛ ጊታ ኪያቴሳኔ ኢዛ ዳንዳያ ዱሬቴሳ ኔ ሌቃይ? <sup>5</sup> ጊዶ አቲን ኔኒ ኔ ዎዝና ሙሜቴሳኒኔ ማሮቴስ ኮፑንታ ኔ ዎዝና ጌዶን ቱማ ሶሳ ፐርዳይ ቆንጨዛ ዎዴ ሶሳ ሃንቆ ጋላሳስ ኔ ቦላ ዳሮ ሃንቆ ሺሻሳ። <sup>6</sup> ሶሲ ኢሳስ ኢሳስ ኢዛ አሶ ማላ ኢማና። \* <sup>7</sup> ሎዎ አሶ አጎንታ አሲዲ ቦንቾ ሳባኔ ሜርና ደዎ ኮዩዛይታስ ሜርና ደዎ ኢማና። <sup>8</sup> ጊዶ አቲን ባርካ ባና ዶሲዛይታሲኔ ቱማ አጋጊዲ ኢታ ካሊዛይታ ቦላ ፐርዳይኔ ሃንቆይ ጋካና። <sup>9</sup> ኢታ አሲዛ አይ አሳ ቦላ ኮይሮ አይሁዳ አሳ ቦላ ካሊዲ አይዛቤታ ቦላ ዋይይኔ ሜቶይ ጋካና። <sup>10</sup> ጊዲኮካ ሎዎ አሲዛዴስ አናስካ አይሁዳ አሳስ ጊዲን አይዛቤታስ ሳባይ፤ ሳሮቴሲኔ ቦንቾይ ጊዳና። <sup>11</sup> ሶሲ አናካ ሻኪ ማዴና። \*

<sup>12</sup> ካሴ ዎጋይ ኤቆንታ ዎዴ ናጋራ አሲዳ አሳይ ዉሪካ ዎጋይ ባይንዳ ዳያና፤ ዎጋይ ኤቂ ሲሚን ናጋራ አሲዳይቲ ዎጋን አይኬቲዲ ፐርዴታና። <sup>13</sup> አይሲ ጊኮ ሶሳ አቻን ጊሎ ጌቴቲዛይቲ ኤቂዳ ዎጋስ አዛዜቲዛይታ፤ አቲን ዎጋ ሲሲ ሲዩዛይታ ፃላ ጊዴቴና። <sup>14</sup> ዎጋይ ባይንዳ አይዛቤቲ ዎጋይ ዮቲዛይሳ ጮ ሚላ ሃኖቴሳፌ ኤሪዲ አሲሺን ኢስታስ ዎጋይ ባይንዳ አጊኮካ ኢስታስ ሜዴቴሳ ዎጋይ ዲዛ ጊሽ ኢስቲ ባ አሳናይሳ ኤሬቴስ። <sup>15</sup> ኢስታ

\* 2:1 ማቶ 7:1፤ ሉቃ 6:37 \* 2:6 ማዛ 62:12፤ ሌዎ 24:12 \* 2:11 ዛሬ 10:17

ዎዝናይ ኢስታስ ማርካቲዛ ጊሺኔ ኢስታ ቆፋይ ኢስታ ሞቲዛ ጊሽ ቃሴካ ኢስታ ማዲዛ ጊሽ ዎጋይ ዮቲዛይ ኢስታ ዎዝናን ፃፌቲዳይሳ ኤሬቴስ።<sup>16</sup> ሄሲካ ታ ሚሺራቾ ቃላን ታማርሲዛ ማላ ያሲ አሳ ዎዝናን ቆቴቲዳይሳ ኪርስቶሳ ባጋራ ፒርዲዛ ጋላሳን ቆንጩሳና።

**አይሁዳታኔ ኢስታ ዎጋ**

<sup>17</sup> ኔ ኔና አይሁዳ አስ ጊኮ ዎጋን አማኔታሳኔ ኔስ ያሳራ ዲዛ ኢሲፌቴላን ጩቁታሳ።<sup>18</sup> ዎጋ ካሊዛ ጊሽ ያሳ ሹኔ ኤራዳ ኩሜስ ጊዲዛዝ ሻካ ኤሪዳ ጊዲኮ።<sup>19</sup> ኔ ቆቁታ ካሌሲዛዴ፤ ጳማን ዲዛይታስ ፖዎ ጊዲዳይሳ ኔ አማኔቲዳዴ ጊዲኮ<sup>20</sup> ዎጋፔ ኔ ዴሚዳ ኤራቴላኔ ቴማቴላን ሃንኮ ኤሮንታይታ ዞሪዛዴ። ጉላ ናይታ ታማርሲዛዴ ጊዲኮ<sup>21</sup> ሂስቲኮ ኔኔ ሃራታ ታማርሶ አጋዳ ኔ ሁዔስ አዛስ ታማሪኪ? ኔ ሃራ አሲ ካይሶቶፓ ጋ ሳባካሹ ኔስ ካይሶታይ? <sup>22</sup> ኔ ሃራ አሳይ ላይማቶንታ ማላ ዮታሹ ኔስ ላይማታይ? ኔስ ኤቃ ኢፃሳሺን ያሳ ኬላ ሚሻ ቦንቃይ? <sup>23</sup> ኔስ ዎጋን ጩቁታሳ ሺን ዎጋ ኔ ባጋራ አሶንታ አጋዳ ያሳ ካዉሻይ? <sup>24</sup> ሄሲካ “ኢንቴ ጌዶን ያሳ ሱንሲ አይዛቤታ አቻን ጫዬቴስ” ጌቴቲ ፃፌቲዳ ማላ ሃኒዴስ። \*

<sup>25</sup> ኔ ዎጋ ናጋ ፖሊዛዴ ጊዲኮ ቃፃራስ ጎዓይ ዴስ። ኔ ዎጋ አሶንታዴ ጊዲኮ ቃሴ ኔ ቃፃራይ ጮ ሃዳ።<sup>26</sup> ቃፃራቶንታ ዲሹ ዎጋይ ጊዛይሳ ፖሊኮ ቃፃራቲዳዴራ ጊና ቆዴቴኔ?<sup>27</sup> ኔስ ፃፌቲዳ ዎጋይኔ ቃፃራይ ኔስ ዲኮ ዲዛ ዎጋ ኔ ናጎንታዴ ጊዲኮ ሃንኮ ቃፃራቶንታ ዳሹ ዎጋስ አዛዜቲዳይ ኔ ቦላ ፒርዳና።

<sup>28</sup> ኢሳዴይ ጮ ሜላ ሱንሳስ አሳ አይፌን ታ አይሁዳ አስ ጊዳና ጊኮ ኢዜ አይሁዳ አሲ ጊዴና። ቴማፔ ቃፃራቴሲ ጮ ካሬራ አሻ አይፌን ቤቲዛ ቃፃራ ጊዴና።<sup>29</sup> ጊዲኮካ ኢሲ አሲ አይሁዳ አስ ጊዳናስ ዳንዳዬዛይ ኢዛስ ጋላ ባጋራ አይሁዳ አስ ጊዲሺና። ቃፃራይካ ቃፃራ ጊዲዛይ ፃፌቲዳ ዎጋ ፃላላ ጊዶንታ አያናን ዎዝናፔ ጊዲዳ ቃፃራ ጊዲኮኮ! ሄሳ ማላ አሲ ጋላታ አሳፔ ጊዶንታ ያሳፌ ዴሜስ። \*

**3**

<sup>1</sup> ሂስቲኮ አይሁዳ አስ ጊዴሳስ አዛ ጎዓይ ዲዜ? ቃፃራይ አይ ጎዲዜ? <sup>2</sup> አዋራካ ጊዲን ጎዓይ ዳሮ። ሃራፔ ኮይሮ ያሳ ቃላይ ሃዳራ አይሁዳታስ ኢሜቲዴስ። <sup>3</sup> ኢስታፌ ኢሲ ኢሳዴስ አማኖይ ባይንዳ አጊኮ ያሳ አማኖቴስ ዲጊዜ? <sup>4</sup> ሙሌካ ዲጌና! አሲ ዉሪካ

\* 2:24 ኢሳ 52:5 \* 2:29 ዛሬ 30:6

ዎርዳንቻ ቅ1 “ኔኒ ኔ ቃላፔ ዴንዲዳይሳን ቱማንቻ፤ ቅ2 ፐርዳንካ ምኒዳዴ ጊዳሳ” ሄሳሶ ጌቱቲ ፃፊቲዳ ማላ ምሲ ቃሴ ቱማንቻ። \*

5 ኑ ማካላ አሶይ ምሳ ሂሎቴስ ቆንጩን ቤሲዛይሳ ጊዲኮ ሂስቲን ኑ አይ ጋኔ? ጮ አሳ ዎጋ ማላ ፓላሜታናስ ምሲ ባ ሃንቆ ኑ ቦላ ኤሂዛይሲ ኑስ ቤሴና ጋኔዩ? ሄሳካ ታ ጊዛይ አሳሶ ቆፋና። 6 ቱማፔ ሄሳሶ ሃኔና። ሄሳሶ ሃኒዛ ጊዲኮ ምሲ አላሜ ቦላ ዎስቲ ፐርዳንዴ?

7 ታ ዎርዶቴስ ምሳ ቱማቴስ ቆንጩሲዛይሳን ኢዛ ቦንቾ ጌዴ ጉጂዛይሳ ጊዲኮ ሂስቲን ሃጺ ጋካናስ ዎስቲ ታ ቦላ ናጋራንቻ ማላ ፐርዴቲዜ? ጊዲ ፓላሜታና አሲ ዳና ዳንዳዩስ። 8 ሄሳ ጉሲ “ሎዎይ ያና ማላ አኔ ኢታ አሶስ” ጌቱስ ጊዲ ኢሲ ኢሲ አሳቲ ኑ ቦላ ዎሬሲዛይሳ ማላ። ሃይታ አሳታ ቦላ ጋኪዛ ፐርዳይ ቱሙ ፐርዳ።

**አሲ ወሪ ናጋራንቻ**

9 ሂስቲን ኑ አይ ጊኖ? ኑኒ ኢስታፌ አጂዞኒ? ሙሌካ አጾኮ። አይሁዳታ ጊዲኮካ አይዛቤታ ጊዲኮካ ወሪካ ናጋራፔ ጋርሳ ባጋራ ዲዛ ጊሽ ታ ወርሳካ ካሴታዳ ኢስታስ ዮታዲስ። 10 “ሂሎይ አኒካ ዴና፤ ኢሳዴይካ ዴና። 11 ዩሺ ቆፐዛዴይ ባዋ፤ ምሴ ኮዩዛይ ኢሳዴይካ ባዋ።

12 ወሪካ ባሌቲዳኔ

ኢሲ ቦላ ጎዎንታይታ ጊዲዳ።

ሎዎ አሲዛይ አኒካ ባዋ፤

ኢሳዴይካ ዴና።

13 ኢስታ ዱናይ ዶዶ ዲዛ ዱፎ ማላ፤

ኢስታ ዱናይ ኡባ ዎዴ ባሌሶ ሃሳዩስ፤

ኢስታ ሜቴርሻይ ሾሻ ማርዜራ ዴስ። \*

14 ኢስታ ዱናን ቃንጌሲኔ ጫዋ ሚሽ ኩሚዴስ። \*

15 ኢስታ ቶሆይ ሱስ ጉሳናስ ኤሶቴስ።

16 ኢስታ አጌን ዳዮይኔ ላፋቴስ ዴስ።

17 ኢስቲ ሳርቴሳ አጌ ኤሬቴና።

18 ኢስታ አይፌሶን ምሳስ ባቦይ ባዋ” ጌቱቲ ፃፊቲዳ ማላ። \*

19 ሄሳ ጊሽ ዱናይ ወሪካ ጎርዴታና ማላ ዴሬይ ኩሜስ ምሳስ ዛር ኢማና ማላ ዎጋይ ጊዛይ ወሪካ ዎጋፔ ጊዶራ ዲዛይታስ ጊዲዳይሳ ኑ ኤርስ። 20 ሄሳ ጊሽ ዎጋይ ናጋራይ አዛኮኔ ኤሪሴስ አቲን ዎጋ ናጎን አኒካ ኢዛ አቻን ሂሎ ጌቱታናስ ዳንዳዩና።

**አማኖን ቤቲዛ ሂሎቴስ**

\* 3:4 ማዛ 51:4 \* 3:13 ማዛ 5:9፤ 140:3 \* 3:14 ማዛ 10:7 \* 3:18 ማዛ 36:1

21 ሃሲ ቃሴ ዎጋ ካሴ ናቤቲ ኢዛስ ማርካቲዳይስ ዎጋፔ ካሬራ ጊዲዳ ያሳ ሂሎቴሲ ቆንጨዴስ። 22 ሄሲ ያሳ ሂሎቴሲ ዮሱስ ኪርስቶሳ አማኖን ዱማቴሲ ባይንዳ ቤቲዛ ሂሎቴሳ። \*

23 ጋሶይካ አሲ ዉሪካ ናጋራ አሲዴስ። ያሳ ቦንቾይካ አሳ ናስ ፓጨዴስ። 24 አሳይ ዮሱስ ኪርስቶሲ አሳ ና ጊሽ አሲዳ ኪያቴሳፌ ዴንዲዳይሳን ጮ ሚላ ሂሊዴስ። 25 ኢዛ ሱሳን ጊዲዳ አማኖን ናጋራፔ ማሬታና ያርሾ ሂስቲዲ ያሲ ዮሱሳ ሺሺዴስ። ኢዚ ሄሳ አሲዳይ ካሴቲዲ ፖሌቲዳ ናጋራ ቃዓኖንታ ዳንዳያን አዲዳ ባ ሂሎቴሳ ቤሳናሳ። 26 ኢዚ ሄሳ ሃ ዎዴዛን አሲዳይ ባ ሂሎቴሳ ሄሲካ ባ ባጋራ ሂሎ ጊዲዳ ዮሱስ ኪርስቶሳን አማኒዛዴ ሂሊሲዛይሳ ቤሳናሳ።

27 ሂስቲን ኑኒ ኢዛን ጩቄቲዛ ሚሺ አዚ ዲዜ? አይኮ ሚሻንካ ጩቄቶኮ። ኑ ጩቄታና ጋሶይ አዜ? ዎጋ ናጊዛ ጊሹ? ጊዴና፥ አማኖና። 28 አይ አሲካ አማኖን አቲን ዎጋ ናጎን አቶንታይሳ ኑ ጊሺ ዮቶስ።

29 ያሲ አይሁዳታ ያሴ ዓላላ? አይዛቤታስካ ያሴ ጊዴኔ? ኤ አይዛቤታስካ ኢዚ ያሳ። 30 ቃዓሬቲዳይሳ አማኖን ቃሴ ቃዓሬቶንታይሳካ ሄ አማኖንካ ሂሊሲዛይካ ኢዚ ኢሲ ያሳ ዓላ። \*

31 ሂስቲን ሄሲ ሄሳ ጊዲኮ አማኖ ጊዶን ዎጋ ጎዓይ ባይንዳ ሚሽ አሲኖ? ሙሌካ ሄሳሶ ሃኔና፤ ዎጋ ኑ ሚንሳና አቲን።

### 4

#### አብራሃሜይ አማኖን ሂሊዴስ

1 ሄሳ ጊሽ ቃሴ ኑ አብራሃሜይ ሃይሳፌ አይ ጎዓ ዴሚዴ ጊኖ? 2 አብራሃሜይ ባ አሶን ሂሊዳኮ ኢዚ ጩቄታናዚ ኢዛስ ዴስኮ ሺን፤ ኢዚ ያሳ ሲንሳን ጩቄታናስ ዳንዳዮና። 3 ጊሻ ማዓፋይ “አብራሃሜይ ያሴ አማኒዴሲኔ ኢዛ አማኖይ ኢዛስ ሂሎቴሳን ቆዴቲዴስ” ጊስ። \*

4 ኢሳዴይ አሶ አሲኮ ኢዚ ኤኪዛ ሚሻይ ኢዛስ ጮ ኪያቴስ ኢሜቲዛዝ ጊዶንታ ኢዛዴስ አሶ ዋጋ ጊዴስ። 5 ጊዶ አቲን አሶ አሶንታ ናጋራንቻ አሲ ሂሎ ኬሲዛ ያሳን አማኒዛዴስ ኢዛ አማኖይ ኢዛስ ሂሎቴሳን ታይቤቴስ። 6 ዳዉቴይካ ሂሎቴሲ ኢዛዴስ ቆዴቲዛይ ሎዎ አሶን ጊዶንታ አሳ ጊሽ።

7 “ኢስታስ ኢስታ ባላ አሶይ አቶ ጌቴቲዳይቲኔ ናጋራፔ ማሬቲዳይቲ አንጄቲዳይታ!

\* 3:22 ጋላ 2:16 \* 3:30 ዛሬ 6:4፤ ጋላ 3:20 \* 4:3 ሜዴ 15:6፤ ጋላ

8 ኢዛ ናጋራ ጎዳይ ሙሴካ ቆዶንታዴይ ኢዚ ኣንጄቲዳይሳ!” ጊዴስ።

9 ሃ ኣንጄዚ ቃፃሬቲዳይታስ ገላላዩ? ዎይኮ ቃፃሬቶንታይታሳራ? “ካሴ ኮይሮ ኑ አዋ አብራሃሜ አማኖይ ኢዛስ ሂሎቴሳን ቆዴቲዴስ” ጊዴስ።

10 ሂስቲን ዋኒ ኢዛስ ሄሳሶ ቆዴቲዴስ? ኢዚ ቃፃሬቲዳይቲ ጉዩ? ዎይኮ ቃፃሬታናፔ ካሴ? ኢዛስ ሂሎቴሳን ቆዴቲዳይ ኢዚ ቃፃሬታናፔ ሲንሳና። 11 ኢዚ ካሴ ቃፃሬታናፔ ካሴ ዴሚዳ ሂሎቴሳይ ቃፃሬስ ማላታ ጊዳና ማላ ሂሎቴሳስ ማታሜ ኤኪዴስ። ሄሳ ጊሽ ቃፃሬቶንታ አማኒዛይታስ ሂሎቴስ ቆዴታና ማላ ኡባታስ ኢዚ አዋ። \* 12 ኢዚ ቃፃሬቲዳይታስካ አዋ፤ ቃፃሬቲዳይታስ ገላላ ጊዴንታ ኑ አዋ አብራሃሜይ ካሴ ቃፃሬታናፔ ሲንሴ ኢዛስ ዲዛ አማኖ ጌዶ ካሲዛይታስ ኡባሳ።

**አማኒዛ አሳስ ኢሜቲዳ ኡፋይስ**

13 ኢዚ አላሜ ላቲዛዴ ጊዳና ማላ አብራሃሜይኔ ኢዛ ዜሬሳቲ ኡፋይሳ ቃላ ኤኪዳይ ዎጋ ባጋራ ጊዴንታ አማኖን ጊዲዳ ሂሎቴሳና። \* 14 ዎጋ ናጊዛይቲ ላቲዛይታ ጊዲኮ አማኖስ ጎዳይ ዴና፤ ሂዶታይካ ጮ ሃዳ ጊዳናሺን፤ 15 ዎጋይ ሃንቆ ካሌሴስ። ዎጋይ ባይንዳሶን ዎጋፔ አዴስ ዴና።

16 ሄሳ ጊሽ ሂዶታይ አማኖን ዩዴስ። ሄሲካ ኢዛ ሂዶታይ ኢዛ ኪዶቴሳን ጊዳና ማላኔ አብራሃሜ ዜሬሳስ ኡባስ አማኒቲዛይሳ ጊዳና ማላ ሃኒዴስ። ሄሲካ ዎጋን ኢዛይታ ጊዲዳይታስ ገላላ ጊዴንታ አማኖን አብራሃሜ ናይታ ጊዲዳይታስ ኡባታሳ። ኢዚካ ኑስ ኡባስካ አዋ። \* 17 ሄሲካ “ታ ኔና ዳሮ ዴሬ አዋ አሳዲስ” ጌቴቲ ሃሬቲዳ ማላ ሃኒዴስ። ኢዚካ ሃይቁዳይታስ ዴዎ ኢሚዛዴን ባይንዳይሳ ቃሴ ዲዛ ማላ አሲዛዴን አማኒዳ ዎሳ ሲንሳን ኢዚ ኑስ አዋ። \*

18 ካሴ ኢዛስ “ኔ ዜሬሲ ሄሳሶ ሃናና” ጌቴቲዳ ማላ አይኮ ሂዶታይካ ባይንዳ ዲሺን አብራሃሜይ ዎሲ ሃናና ጊዳይሳ አማኒዲ ዳሮ ዴሬ አዋ ጊዲዴስ። \* 19 አብራሃሜስ ዩሌቲን ጌቱ ላይስ ጊዲቺን አብራሃሜይ ባ አሳቴሳይ ሃይቁሳ ማላ ጊዲዳይሳኔ ሳራስ ዩሎ ዎዴይ አዲ ቢዳይሳ ኤሪሼካ አማኖን ሌፒቤና። \*

20 ጌዴ ጉጂዲ አማኖን ሚኒዲ ዎሳስ ቦንቾ ኢሚዴስ አቲን ዎሲ ጊዳ ቃላ ሲዲቤና። 21 ዎሲ ኢዛስ ኢሚዳ ሂዶታይ

\* 4:11 ሜዴ 17:10 \* 4:13 ሜዴ 17:4-6፤ 22:17-18፤ ጋላ 3:29 \* 4:16 ጋላ 3:7 \* 4:17 ሜዴ 17:5 \* 4:18 ሜዴ 15:5 \* 4:19 ሜዴ 17:17



ፖሌታናይሳ ኩሜሳ ዎዝናፔ አማኒዴስ።<sup>22</sup> ሄሳ ጊሽ ኢዛስ  
 ዊሎቴሳን ቆዴቲዴስ።<sup>23</sup> “ኢዛስ ዊሎቴሳን ቆዴቲዴስ” ጊዛ ቃላይ  
 የፌቲዳይ ኢዛስ የላላ ጊዴና።<sup>24</sup> ጊዶ አቲን ያሲ ኑ ዊሎቴሳ  
 ኢዛ ባጋራ ታዩቢዛ ኑ ጎዳ ዩሱሳ ሃይቆፔ ዴንሲዳይሳን አማኒዛ  
 ኑሳራ።<sup>25</sup> ኢዚ ኑ ናጋራ ጊሽ ሃይቃናስ አዲ ኢሜቲዴስ። ኢዚ  
 ኑና ዊሊሳናስ ሃይቆፔ ዴንዲዴስ። \*

5

**ሳሮቴሴኔ ኡፋሶስ**

<sup>1</sup> ሂስቲኮ ኑኒ አማኖን ዊሊዳ ጊሽ ኑ ጎዳ ዩሱስ ኪርስቶሳ ባጋራ  
 ኑስ ያሳራ ሳሮቴሴ ዴስ።<sup>2</sup> ሃይሳ ሃ አማኖዛን ሚኒ ዲዛ ኪያቴሳን  
 ኑኒ ጌሊዳይ ኢዛ ባጋራ ጊዲዳ ጊሽ ኡፋሶሳን ያሳ ቦንቾ ጊሼቲ  
 ኤኪዛይታ ጊዲዳ ጊሽ ኑ ኡፋሶስ።

<sup>3</sup> ሃይሳን የላላ ጊዶንታ ኑና ጋኪዛ ዋዩንካ ኡፋሶቶስ። ጋሶይካ  
 ዋዩይ ዳንዳያን ጋሲዛይሳ ኑ ኤርስ።<sup>4</sup> ዳንዳያይ ፓጩን ሚኖቴሴ  
 ኢሜስ፤ ፓጩን ሚኖቴሴ ሂዶታ ኢሜስ።<sup>5</sup> ሄ ሂዶታይ ቃሴ  
 ኑና ዩላቼና። ያሲ ኑስ ኢሚዳ ዊሎ አያናን ባ ሲቆ ኑ ዎዝናን  
 ጉሲዳ ጊሽ ሄ ሂዶታይ ኑና ዩላን ጋሴና።

<sup>6</sup> ኑ ዳቡራንቻታ ጊዲ ዲሺን ያሳ ዎዴይ ጋኪዳ ማላ ኪርስቶሲ  
 ኑ ናጋራ ጊሽ ሃይቂዴስ።<sup>7</sup> ዊሎ አሳ ጊሽ ሃይቃና አሲ ቤታናይሲ  
 ዳር ሜቴስ። ሎዎ አሳ ጊሽ ሃይቃናስ የላና አሲ አኔ ኤሪዛይ ቤታና  
 ዳንዳዩስ።<sup>8</sup> ጊዶ አቲን ኑ ቡሮ ናጋራንቻ ጊዲ ዲሺን ኪርስቶሲ  
 ኑ ጊሽ ሃይቂዴስ። ሄሲካ ያሲ ኑና ሲቂዛ ባ ሲቆ ሄሳን ቤሴስ።

<sup>9</sup> ኑኒ ኢዛ ሱሳን ጌዩዳይታ ጊዲኮ ሃራፔካ ኢዛ ባጋራ ያሳ  
 ሃንቆፌ አታና።<sup>10</sup> ኑ ያሳስ ሞርኬታ ጊዲ ዲሺን ኢዛ ናዛ ሃይቆን  
 ኢዛራ ጊጊዳይታ ጊዲኮ ኑ ኢዛራ ጊጊዳፔ ጉዩ ኢዛ ናዛ ዴዎ  
 ባጋራ ኑኒ ፓዊዳይሲ ዋኒ ኬሂ ዳሬኔ!<sup>11</sup> ሄሳ የላላ ጊዴና፤ ቃሴካ  
 ኑኒ ሃዲ ኢዛራ ጊጋ ዴሚዳ ኑ ጎዳ ዩሱስ ኪርስቶሳ ባጋራ ያሳንካ  
 ኡፋሶስ አሶስ።

**ሃይቆይ አዳሜ ባጋራ፣ ዴዎይ ኪርስቶሳ ባጋራ ዩዴስ**

<sup>12</sup> ሄሳ ጊሽ ናጋራይ ኢሳዴ ጋሶን ዱጌ ሃ አላሜዛ ዩዳ ማላ  
 ሃይቆይካ ናጋራ ጋሶን ዩዴስ። ሃይቆይካ ሄሳ ባጋራ አሳ ኡባኮ  
 ዩዴስ። ሄሳስ ጋሶይ አሲ ዉሪካ ኢዛ ባጋራ ናጋራ አሲዳ ጊሻሳ።

\* <sup>13</sup> ዎጋይ ኢሜታናፔ ካሴ ናጋራይ ቤታ ቦላ ዴስ ሺን ዎጋይ  
 ባይንዳሶን ናጋራይ ናጋራ ጊዴና።<sup>14</sup> ጊዶ አቲን አዳሜፔ ሃ  
 ሲሚን ሙሴ ዎዴ ጋካናስ ዲዛ ዎዴን አዳሜ ማላ ዎጋ ሜንሲዲ

\* 4:25 ኢሳ 53:4-5 \* 5:12 ሜዴ 3:6

ናጋራ አላንታይታ በላካ ሃይቆይ ካዎቲዴስ። አዳሜይ ቡሮ ያና ኪርስቶሳስ ሌሚሶ።

15 ጊዲኮካ ኢዛ ኪያቴላ ኢሞታይ አሳ ቆሆ ማላ ጊዴና። ኢሳዴይ ሞሪዳይሳን ዳሮ አሳይ ሃይቂኮካ ያሳ ኪያቴላኒኔ ኢሲ አሲ ዩሱስ ኪርስቶሳ ኪያቴላን ዩዳ ኢሞታይ ዳሮታስ ኬሂ ዳሪ ኢሜቲዴስ። 16-17 ቃሴካ ያሳ ኢሞታይ ኢሳዴ ባጋራ ዩዳ ናጋራ፤ ቤቲዳ አይፌ ማላ ጊዴና። ጋሶይካ ኢዛ ፐርዳይ ኢሳዴ ናጋራ ካሊዲ ፐርዳ ኤኪ ዩዴስ። ኢዛ ኢሞታይ ቃሴ ዳሮ ቆሆ ጋሶን ሂሎቴሳ ኤሂዴስ። ሃይቆይ ኢሳዴ ባጋራ ካዎቲዳይሳ ጊዲኮ ዳሮ ቲርፓ ጊዲዳ ያሳ ኪያቴላኒኔ ሂሎቴላ ኢሞታ ኤኪዳይቲ ኢሳዴ ባጋራ ሄሲካ ዩሱስ ኪርስቶሳ ባጋራ ያንዲ ዴያን ዳና።

18 ሂስቲኮ ኢሳዴ ቆሆ ጊዶን ፐርዳይ አሳ ኡባ በላ ጋኪዳ ማላ ሄሳሶካ ኢሳዴ ሂሎቴላ አሶን አስ ኡባስ ዴያ ኢሚዛ ሂሎቴላ ቤቲዴስ። 19 ኢሳዴይ አዛዜቶንታ ኢዲዳ ጊሽ ዳሮ አሳይ ናጋራንቻ ጊዲዳ ማላ ኢሳዴ አዛዜቴላን ቃሴ ዳሮቲ ሂላና።

20 ዎጋይ ዩን ሞሮይ ዳሪዴስ። ጊዶ አቲን ናጋራይ ዳሮይሳፌ በላራ ያሳ ኪያቴላ ኬሂ ዳሪዴስ። 21 ሄሲካ ሃኒዳይ ናጋራይ ሃይቆ በላ ካዎቲዳይሳ ማላ ዩሱስ ኪርስቶሳ ባጋራ ቃሴ ሜርና ዴያይ ቤታና ማላ ኢዛ ኪያቴላ ሂሎቴላን ካዎታናሳ።

6

ናጋራ፤ ሻኬቲዲ ኪርስቶሳን ዱስ

1 ሂስቲን ኑ አይ ጊኖ? ያሳ ኪያቴላ ዳራና ማላ ናጋራ ጉጂ አሲኖ? 2 ሙሌካ ጊዴና። ኑኒ ናጋራስ ሃይቂዶስ። ሂስቲን ሃይሳፌ ጉዬ ኑ ዋኒ ናጋራን ዳኔ? 3 ኑኒ ዩሱስ ኪርስቶሳራ ኢሲኖ ጊዳና ማላ ፃማቂቲዳይቲ ኢዛ ሃይቆን ኑ ኢሲፌ ጊዳናስ ፃማቂቲዳይሳ ሃይሳ ኢንቴ ኤሬኬቲ? 4 ሄሳ ጊሽ ኪርስቶሲ ባ አዎ ቦንቾን ሃይቆ፤ ዴንዲዳ ማላ ኑኒካ ሄሳሶ አራሳ ዴያን ዳናስ ሂንቃቴን ሃይቂዲ ኢዛራ ሞጊቲዶስ። \*

5 ኑኒ ሄሳ ማላ ሃይቆን ኢዛራ ኢሲኖ ጊዲኮ ቃሴ ዴንላንካ ኢዛራ ኢሲኖ ጊዶስ። 6 ሃይሳፌ ጉዬ ኑ ናጋራስ አይሌ ጊዶንታ ማላ ናጋራ አሳቴሳይ ኪቻና ማላ ካሴ ኑ ጩጋ አሳቴሳይ ኢዛራ ኢሲፌ ካቂቲዳይሳ ኑ ኤሮስ። 7 ጋሶይካ ሃይቂዳ አሲ ናጋራ፤ ሼምፐዴስ።

8 ኑኒ ኪርስቶሳራ ሃይቂዳይታ ጊዲኮ ኑ ኢዛራ ኢሲፌ ዳናይሳ አማኖስ። 9 ኪርስቶሲ ሃይቆ፤ ዴንዲዳ ጊሽ ናምሳንሶ ኢዚ ሃይቆንታይሳኒ ኢዛ በላ ሃይቆስ ዎልቃይ ባይንዳይሳ ኑ ኤሮስ።

\* 6:4 ቆላ 2:12

10 ኢዚ ሃይቂዳ ዎዴ ኢሲቶ ዉርሲ ናጋራ ጊሽ ሃይቂዴስ። ጊዶ አቲን ያሳስ ፓፃ ዱስ ዴስ። 11 ሄሳሶካ ኢንቴ ናጋራስ ሃይቂዴ ያሳስ ዩሱስ ኪርስቶሳ ባጋራ ፓፃ ዲዛይሳ ኤሪቴ።

12 ሄሳ ጊሽ ኢታ አሳና ኮዪዛ ኢታ አሾ ቆፋ ኮይዲ ሃይቂዳ ኢንቴ አሳቴሳ ቦላ ናጋራይ ካዎታና ማላ አሶፍቴ። 13 ኢንቴ አሳቴሳ ኢታ አሶ አሲዛ ሚሽ አሲ ናጋራስ ሃሪሶፍቴ። ሄሳ ማላ አሳናፕ ሃይቆፕ ጌዴ ዴዎን ፒኒዳ አሳታ ማላ ኢንቴና ያሳስ ሃሪሲቴ። ኢንቴ አሳቴሳ ሂሎቴሳ ሚሻ ማላ ያሳስ ሃሪሲቴ። 14 ኢንቴ ያሳ ኪያቴሳ ጋርሳን ዴታ አቲን ዎጋ ጋርሳን ዶንታ ጊሽ ኢንቴና ናጋራይ ሃሬና።

**ሂሎቴሳ አሳንቻታ**

15 ሂስቲን አይ አሲኖ? ዎጋ ጋርሳን ጊዶንታ ኑኒ ያሳ ኪያቴሳ ጋርሳን ዲዛ ጊሽ ናጋራ አሲኖ? ሙሴ አሳናስ ቤሴና።

16 ኢንቴ ኢንቴና አይሌ ማላ ሺሺዛ ዎዴ ኢንቴ አዛዜቲዛዴስ አይሌ ጊዲዳይሳ ኤሬታ። ሄሳሶካ ጌዴ ሃይቆኮ ኤሬዛ ናጋራስ ዎይኮ ሂሎቴሳኮ ጋሲዛ አዛዜቴሳስ ኢንቴ አይሌ ጊዲዳይሳ ኤሬኬቲ? 17 ኢንቴ ካሴ ናጋራስ አይሌታ ጊዲኮ ኢንቴስ ኢሜቲዳ ቴሚርቴዛስ ኢንቴ ዎዝናፕ አዛዜቲዳ ጊሽ ያሲ ጋላቴቶ። 18 ኢንቴ ናጋራፕ ዎዜቲዲ ሂሎቴሳስ አይሌ ጊዲዴታ።

19 ሃይሳ ታ አሳ ቃላን ኢንቴስ ቆንጩን ዮቲዛይ ኢንቴ ዩሌቴሳን ዳቡራንቻ ጊዲዳ ጊሻሳ። ኢንቴ ካሴ ዎዴ ኢንቴ አሳቴሳ አይሌቴሳሲኔ ካሴፕ አዲ ኢታና ማላ አሲ ኢሜታ ሺን ሃሲ ቃሴ ጌዴ ጌሻቴሳኮ ኤሬዛ ሂሎቴሳስ አይሌ ሂስቲ ሃሪስቴ።

20 ኢንቴ ካሴ ናጋራስ አይሌቲዲ ዲዛ ዎዴ ኢንቴ ሂሎቴሳፊ ሜላ አቲዴታ ሺን? 21 ሃሲ ቃሴ ኢንቴ ዩላቲዛ ሚሻታፕ ሄ ዎዴ አይ ጎዳ ዴሚዴቲ? ሄሳ ሄ ሃናዛ ጎዳይ ሃይቆ። 22 ሃሲ ቃሴ ኢንቴ ናጋራፕ ዎዜቲዲ ያሳ አይሌታ ጊዲዴታ። ሄሲካ ኢንቴና ጌዴ ጌሻቴሳኮ ካሴሴስ። ዉርሴሳይካ ሜርና ዴዎ። 23 ናጋራ ዋጋይ ሃይቆ፤ ጊዶ አቲን ያሳ ኢዎታይ ጊዲኮ ጎዳ ዩሱስ ኪርስቶሳ ባጋራ ሜርና ዴዎ።

7

**ኤኮኔ ጌሎ ለሚሶ**

1 ታ ኢሻቶ! ታኒ ዎጋ ኤሪዛ አሳታስ ዮታይስ። ዎጋይ ሼዎፖራ ፓፃ ዲዛ አሳ ያላላ ሃሪዛይሳ ኢንቴ ኤሬኬቲ? 2 ኢሲ ማጫሲ አዚና ጌሊኮ ባ አዚናራ ኢዛ ዎጋን ቃሼቲዛይ አዚናይ ፓፃ ዲዛ ዎዴ ጋካና። አዚናይ ሃይቂኮ ኢዛ ማቾ ጊዲዛ ዎጋፕ አንጂታዉስ። 3 ጊዶ አቲን አዚናይ ፓፃ ዲሺን ኢዛ ሃራ አዚና ጌሊኮ ላይማ

ጌቴታውስ። አዚናይ ሃይቂኮ ቃሴ ሃራ አሲ ጌሊኮ ካሴ አዚና ምጋፔ አንጄታዱስ አቲን “ላይማ” ጌቴቱኩ።

4 ሄሳ ጊሽ ታ ኢሻቶ! ኢንቴካ ዩሱስ ኪርስቶሳ አሳቴሳ ባጋራ ምጋስ ሃይቂዴታ። ኢንቴ ሃይቆፔ ዴንዲዳ ኪርስቶሳ ባጋ ጊዲን ኑኒ ያሳስ አይፌ አይፋናሳ። 5 ናጋራንቻ ሜዴቴሳ ሼኔን ኑ ዲዛ ምዴ ሃይቆስ ጋሲዛ አይፌ ኑ አይፋና ማላ ምጋይ ዴንጴሲዳ ናጋራ አሞይ ኑ ቦላ አሲዴስ። 6 ሃሂ ጊዲኮ ካሴ ኑና ሞሂ ቃቺዳ ምጋስ ሃይቂዳ ጊሽ ሄ ምጋፔ ምዜቲዶስ። ሄሲካ ካሴ ጩጋ ምጋን ሃፌቲዳይሳን ጊዶንታ ዲሼ አራሳ አያና አጌን ኑኒ አሳናሳ።

**ናጋራራ ባሜቴስ**

7 ሂስቲን ኑ አይ ጊኖ? ባ ሁዔስ ምጋይ ናጋራ? ሙሌካ ጊዴና። ምጋ ባጋራ ጊዶንታኮ ናጋራይ አዛኮኔ ኑ ኤሮኮኮ ሺን፤ ምጋይ “አሞቶፋ!” ጎንታኮ አሞይ አዛኮኔ ቴማፔ ታ ኤሪኬ። \*

8 ናጋራይ ቃሴ ምጋፔ ኬዚዳ አዛዞይ ቤሲዳ አጌን ጎዔቲዲ ታ ጊዶን ዱማ ዱማ ኢታ አሞ ዴንጴሲዴስ። ምጋይ ያናፔ ካሴ ናጋራይ ሃይቂዳዛ።

9 ምጋይ ባይንዳ ካሴ ታኒ ፓፃ ዳይሲሺን ምጋይ ዩን ቃሴ ናጋራይ ፓፃ ጊዲዴስ። ታ ጊዲኮ ሃይቃዲስ። 10 አስ አሻና ቆፌቲዳ አዛዞይካ ሃይቆ ኤኪ ዩዳይሳ ኤራዲስ። 11 ናጋራይ ምጋ ባጋራ ቤቲዳ ጋሶን ጎዔቲዲ ታና ባሌሲዴሲኔ አዛዞን ምዲዴስ። \*

12 ሄሳ ጊሽ ምጋይ ባ ባጋራ ጌሻ። አዛዞይካ ጌሻ፤ ጊሎኔ ሎዎ። 13 ጊዶ አቲን ሎዎስ ሃኒዳይሲ ታስ ሃይቆስ ጊዲዴ? ሙሌካ ጊዴና። ጊዶ አቲን ናጋራይ ባ ናጋራቴሳን ኤሬታና ማላ ሎዎ ጊዲዳ ሃኖ ባጋራ ታ ቦላ ሃይቆ ኤሂዴስ። ሄሲካ ናጋራይ አዛዞ ባጋራ ካሴፔ አሲ ናጋራ ዳርሲዴስ።

14 ምጋይ አያና ዮዎ ጊዲዳይሳ ኑ ኤሮስ። ታ ቃሴ ናጋራስ አይሌ ማላ ባይዜቲዳ አሳ። 15 ታኒ ታ አሲዛይሳ ኤሪኬ። ታ አሳና ኮዩዛይሳ አሳ ኤሪኬ ሺን ታ ኢጊዛ ሚሽ አሳይስ። \* 16 ታ አሳና ኮዮንታ ሚሽ አሲዛ ጊዲኮ ምጋይ ሎዎ ጊዲዳይሳ ታ ማርካታይስ። 17 ሄሳ አሲዛይ ታና ጊዶንታ ታ ጋሳን ዲዛ ናጋራይ አሴስ።

18 ታናን ሄሲካ ናጋራንቻ ጊዲዳ ታ ሜዴቴሳ ጊዶን አይኮ ሎዎ ሚሽ ባይንዳይሳ ታ ኤራይስ። ሎዎ አሳናስ ታስ አሞቴሳ ዴስ ሺን ፖላ አሳ ኤሪኬ። 19 ታ አሲዛይ አሳና ጋዳ ኮዩዛ ሎዎ አሶ ጊዴና። ጊዶ አቲን ታ አሳና ኮዮንታ ኢታ አሶ አሳይስ።

\* 7:7 ኬሳ 20:17፤ ዛሬ 5:21 \* 7:11 ሜዴ 3:13 \* 7:15 ጋላ 5:17

20 ታኒ አሳናስ ኮዮንታይሳ አሲዛ ጊዲኮ ሄሳ አሲዛይ ታና ጊደንታ ታ ጊደን ዲዛ ናጋራ።

21 ሄሳ ጊሽ ሃይሲ ዎጋይ አሶን ዲዛይሲ ታስ ጌሊዴስ። ሄሲካ ታኒ ሎዎ አሳና ኮዮይሲሺን ኢታ አሳይስ። 22 ታኒ ታ ጋሳራ ያሳ ዎጋን ኡፋዬታይስ። 23 ጊደ አቲን ታ አሳቴሳ ጊደን አሲዛ ናጋራ ዎጋይ ታና ቃቺ አይኪዲ ታ ቆፋ ዎጋራ አሌቲዛ ሃራ ዎጋይ ታ አሳቴሳ ጊደን አሲሺን ቤያይስ። 24 ታ አይ ማላ ላፋ አሴ! ሃይሳ ሃይቆስ ኢሜቲዳ አሳቴሳፌ ታና አሻናይ አኔ? 25 ኑ ጎዳ ዮሱስ ኪርስቶሳ ባጋራ ጋላታይ ያሳስ ጊደ።

ሂስቲኮ ታኒ ታ ባጋራ ታ ቆፋን ያሳ ዎጋስ አይሌ ጊዳሼ ታኒ ታ ሜዴቴሳ ዎጋን ናጋራ ዎጋስ አይሌ።

8

ጊሎ አያናን ዱሳ ጊሺኔ አሾን ዱሳ ጊሽ

1 ሄሳ ጊሽ ዮሱስ ኪርስቶሳ አማኒዛይታ ቦላ ፐርዳይ ዴና።

2 ጋሶይካ ዴዎ አያና ዎጋይ ዮሱስ ኪርስቶሳ ባጋራ ናጋራፕ ኢስታ ጌሺዳ ጊሻሳ። 3 ናጋራንቻ አሾፕ ዴንዲዳይሳን ዎጋይ ፖላናስ ዳንዳዮንታይሳ ያሲ ባ ናዛ ናጋራንቻ አሳ ሌሚሶን ናጋራስ ያርሼታና ማላ ዮዲዲ ፖሊዴስ። ሂስቲዲ ናጋራ ኢዛ አሾን ፐርዲዴስ። 4 ሄሲካ ኑኒ አሾን ጊደንታ አያናን ሲሜሬቲዛ ኑፕ ዎጋይ ኮዬዛ ጊሎቴሳ ፖላናሳ።

5 አሾ ሼኔ ማላ ዳና ኮዬዛ አሳታ ዎዝናይ አሾይ ኮዬዛ ሚሻን ሼምፕስ። አያና ሼኔ ማላ ዲዛይቲ ቃሴ ባ ዎዝና አያናይ ኮዬዛ ሚሻ ቦላ ዎሴቴስ። 6 አሾስ ዓላላ ቆፋይ ሃይቆ ጊዲሺን አያና ዮዮስ ቆፋይ ጊዲኮ ዴዎኔ ሳሮቴሳ። 7 ናጋራስ ሃራቲዛ ዎዝናይ ያሳራ አሻ። ጋሶይካ ኢዚ ያሳ ዎጋስ ሃራቴናኔ ሃራታናስ ዳንዳዮና። 8 አሾ ሼኔ ማላ ዲዛ አሳቲካ ያሴ ኡፋይሳስ ዳንዳዮቴና።

9 ኢንቴ ቃሴ ያሳ አያናይ ኢንቴናን ዲዛ ጊዲኮ አሾን ጊደንታ አያናን ዴታ። ኪርስቶሳ አያናይ ኢዛ ቦላ ባይንዳዴይ ኪርስቶሳስ ጊዴና። 10 ኪርስቶሲ ኢንቴ ጊደን ዲኮ ቃሴ ኢንቴ አሳቴሳይ ናጋራ ጌደን ሃይቆስ ጊዲኮካ ኢንቴ አያናይ ቃሴ ጊሎቴሳ ጋሶን ዴዎን ዴስ። 11 ዮሱሳ ሃይቆፕ ዴንሲዳ ኢዛ አያናይ ኢንቴ ቦላ ዲዛ ጊዲኮ ኪርስቶሳ ሃይቆፕ ዴንሲዳይሲ ኢንቴ ጊደን ዲዛ ኢዛ አያናይ ሃይቃናስ ዲዛ ኢንቴ አሳቴሳስ ዴዎ ኢማና። \*

12 ሄሳ ጊሽ ታ ኢሻቶ! ሄሲካ ሃናናይ ዶሳን ጊዴና ሺን ኑ አሾ ሼኔ ማላ ዳናስ አሾስ ጊደኮ። 13 አሾ ሼኔ ማላ ዲዛ ጊዲኮ ኢንቴ ሃይቃና፤ አሾ አሶ ኢታዛ ኢንቴ አያናን ዎዲኮ ኢንቴ ዴዎን

\* 8:11 1ቆሮ 3:16

ዳና። 14 ያሳ አያናን ካሊዛይቲ ኢስቲ ያሳ ናይታ። 15 ኢንቴ ኤኪዳ አያናይ ዛሪዲ ኢንቴና አይሌቴሳን ሃሪዛ አያና ጊዶንታ “ኑ አዋወ” ጊ ያይጊሲዛ ናቴሳ አያና ኤኪዴታ። \* 16 ኑኒ ያሳ ናይታ ጊዲዳይሳ፤ ሄ አያናይ ባ ባጋራ ኑ አያናራ ኢሲፌ ኑስ ማርካቴስ። 17 ኑኒ ያሳ ናይታ ጊዲኮ ኢዛ ላቲዛይታ። ኑ ኪርስቶሳ ቦንቾዛ ላቲዛይታ ጊዳና ማላ አዳፌካ ኢዛራ ኢዛ ሜቶዛ ጊሼቴዛይታ ጊዲኮ ኑ ያሴ ላቲዛይታ፤ ኪርስቶሳራካ ኢሲፌ ላቲዛይታ።

**ቡሮ ያና ቦንቾ**

18 ሃዲ ኑ ኤኪዛ ዋዩይ ቡሮ ኑስ ሲንሳን ጊጊ ኡቲዳ ቦንቾዛራ ጋሲ ያሊሺን አይኮካ ጊዴና ጋይስ። 19 ሜዴቴሳይ ዉሪካ ያሳ ናይቲ ቆንጫናይሳ ላዋቴሳን ናጎን ዴስ። 20 ሜዴቴሳ ዉሪካ ሜላ ሃዳ ጊዳና ማላ ፐርዴቴዴስ። ሄሲካ ባ ዶሮን ጊዶንታ ሲንሳፌስ ሃራታና ማላ ኢዚ ባ ሼኔ ማላ ሃሪሲዳ ጊሻሳ። \* 21 ሄሲካ ሜዴቴሳ ዉሪካ ዳይሳ አይሌቴሳፌ ዎዜቲዲ ያሳ ናይታስ ጊዲዳ ጊዴ ቦንቾቲዳ ሼኔ ማላ ዲዛሶ ጋካናሳ። 22 ሃዲ ጋካናስ ሜዴቴሳ ዉሪካ ዳሮ ዋዩን ሚፃቲሼ ዲዛይሳ ኑ ኤሮስ። 23 ኢዛ ፃላላ ጊዶንታ ኮይሮ ያሎ አያና ኢዋታ ዴሚዳ ኑኒካ ኑ አሳቴሳይ አታና፤ ኑ ኢዛ ና ጊዳናይሳካ ላዋቴሼኔ ዎዝናራ ሚፃቲሼ ዶስ። \* 24 ሃይሳ ሃ ሂዶታን ፃላላ አቲዶስ። ሂዶታይ ቃሴ አይፌን ቤቲዛ ሚሽ ጊዲኮ ቡሮፔ ናጊዛ ሚሽ ጊዴና፤ ሃዲ ባ አይፌን ቤዩዛ ሚሼ ቡሮፔስ ናጊዛይ ኦኔ? 25 ጊዶ አቲን ኑኒ ቡሮ ኑ አይፌን ቤዮንታ ሚሽ ሂዶታን ናጊዛዝ ጊዲኮ ሳሌታይ ባይንዳ ናጎስ።

26 ሄሳሶካ ቃሴ ኑ ዳቡሪሺን አያናይ ኑና ማዴስ። ኑኒ ዎሳ ዎስቲ ዎሳናኮኔ ኤሮንታ ጊሽ አያናይ ኑኒ ቃላን ቆንጫሳናስ ዳንዳዩቶንታ ቃላራ ኑስ ዎሴስ። 27 ኑ ዎዝና ፓጫ ኤሪዛ አያናይ ኢዚ አያና ቆፋ ኤሬስ። ጋሶይካ አያናይ ያሳ ሼኔ ማላ አማኒዛ አሳስ ኑስ ዎሴስ።

28 ያሲ ባና ዶሲዛይታሲኔ ኢዛ ሼኔ ማላ ያይጊቲዳይታስ ኡባስ አሲዛ ሚሽ ዉርሲካ ሎዎስ አሲዛይሳ ኑ ኤሮስ። 29 ያሲ ካሴፔ ባ ኤሪዛይታ ኢስቲ ኢዛ ናዛ ሚሳታና ማላ ካሴካ ዶሪ ዎሲዴስ። ሄሲካ ዳሮ ባ ኢሻታ ጊዶፌ ኢዚ ባይራ ጊዳናሳ። 30 ካሴ ኮይሮፔ ባ ዶሪዳይታ ኢስታ ያይጊዴስ። ቃሴካ ያይጊዳይታ ያሊሲዴስ። ባ ያሊሲዳይታካ ቦንቾዴስ።

**ያሳ ሲቆ**

---

\* 8:15 ማር 14:36፤ ጋላ 4:6 \* 8:20 ሜዴ 3:17-19 \* 8:23 2ቆሮ 5:2-4

31 ሂስቲን ሄሳ ኑ አይ ጊኖ? ምሲ ኑናራ ጊዲኮ ኑናራ ኤቁታናስ ዳንዳዩዛይ አኔ? 32 ባ ናዛስ ሚሼቶንታ ኑ ጊሽ አሲ ኢሚዳይ ኢዛ። ሂስቲን ኡባ ሚሽ ኑስ ኢዛራ ኪያቴሳን ዉርሲ አዛስ ኢሜኔ? 33 ምሲ ዶሪዳይታ ሞተዛይ አኔ? ሂሲሲዛይ ምሳ። 34 ሂስቲን ፐርዲዛይ አኔ? ሃይቁዲ ሃይቆፕ ዴንዲዲ ምሳ ኡቫቻን ኡቲዳ ዮሱስ ኪርስቶሲ ኑ ጊሽ ጋናቴስ።

35 ኑና ኪርስቶሳ ሲቆፕ ሻካናይ አኔ? ሜቶዮ? ሞዮ? ምይኮ ጎዴቴሴ? ምይኮ ጋፋ? ምይኮ ካሎቴሴ? ምይኮ ቆፖንታ ጋኪዛ ሜቶዮ? ማሻ? 36 ሄሲካ ካሴ “ኔ ጊሽ ኑ ሹኪቴዛ ዶርሳ ማላ ቆዴቲዶስ። ጋለስ ኩሜስ ኔ ጊሽ ኑኔ ሃይቆራ ባጌታና” ጌቴቲ ሃሬቲዳይሳ ማላ። 37 ኑና አዚካ ኢዛፕ ሻኪና። ሃይሳ ኡባን ኑና ሲቁዳይሳን ምሳይታፕካ ኑ አዶስ።

38 ሄሳ ጊሽ ሃይቆ ጊዲን፣ ዴፖ ጊዲን፣ ኪታንቻታ ጊዲን፣ ምይኮ ሃሲ ዲዛ ሚሽ ጊዲን፣ ቡሮ ያና ሚሽ ጊዲን፣ ምይኮ አይ ምልቃማ ጊዲን፣ 39 ዶቃ ጊዲን ምይኮ ዚቃ ጊዲን፣ ምይኮ አይ ሜዴቴስ ጊዲን ጎዳ ዮሱስ ኪርስቶሳ ባጋራ ኑስ ዲዛ ምሳ ሲቆፕ ኑና ሻካና ዳንዳዩዛ ሚሺ ባይንዳይሳ ታ ሻካ ኤራዲስ።

9

ምሳ ዶሮ

1 ታ ዮሱሳ ሱንሳን ቴሙ ጋይስ፤ ምርዶቲኪ፤ ታ ምዝናይካ ሂሎ አያና ባጋራ ታስ ማርካቴስ። 2 ታስ ምዝናፕ ኪቾንታ ጊታ ቆፋይኔ ሚሻይ ዴስ። 3 ታ ዳቦታ ጊሽ ታ ቃንጌታዳኔ ኪርስቶሳፕ ሻኪታዳ ምራ ምዲዳኮ ዶሳይስ። 4 ኢስቲካ ኢስራዔሌ ናይታ፤ ኢስቲ ምሳ ና ጊዳና ማላ ምሳ ቦንቾይኔ ጫቆ ቃላይ፣ ምጋይኔ ምሳ ኪሳ ምጋ ሂዶታይ ኢስታስ ኢሜቲዴስ። \* 5 ካሴ አዋቲካ ኢስታ ባጋ ኪርስቶሲ ኢስታ ዜሬሳ ዛርኪን ቆዴቴስ። ኢዚካ ኡባሬ ቦላ ጊዲዳ ሜርናስ ጋላቴቲዳ ምሳ። አሚን።

6 ጊዶ አቲን ሄሳ ጉሲ ምሳ ቃላይ አቲዴስ ጉሲ ጊዴና። ኢስራዔሌፕ ዮሎቲዳይ ዉሪ ኢስራዔሌ አስ ጊዴና። 7 አብራሃሜፕ ዮሎቲዳይቲ ኢዛፕ ዮሎቲዳ ጊሽ ዉሪካ ኢዛ ናይታ ጊዴቴናሺን “ኔ ዜሬስ ዮሳቃ ባጋራ ጌይጌታና” ጌቴቲዳ ማላ ሃንዴስ። \* 8 ሄሳ ጉሲካ ምሳ ና ጌቴቲዳይቲ ኢስቲ አሾን ዮሊዳይታ ጊዴቴና፤ ጊዶ አቲን ና ጊዳናይቲ ሂዶታ ቃላን ዮቴቲ ኡቲዳይታ። 9 “ዩዛ ላይስ ሃን ምዴ ታ ሃ ሲማና፤ ሳራይካ ኔስ አቲማ ና ዮላና” ጌቴቲዲ ኢዛስ ሂዶታ ቃላይ ኢሜቲዴስ። \*

\* 9:4 ኪሳ 4:22      \* 9:7 ሜዴ 21:12      \* 9:9 ሜዴ 18:10

10 ሄሳ ሃላላካ ጊደና። ኢርቢቃ ናይቲ ኢሳዴ ናኮ! ኢዚካ ኑ አዋ  
 ዩሳቃ። 11 ሜንቴቲ ዩሌቲዲ ቡሮ ኢታ ዎይኮ ሎዎ አሶንታ ዲሺን  
 ዎሳ ቆፋይ ሚናና ማላ። 12 አሶን ጊደንታ ሄይጊዳይሳፌ ጊዲዳ  
 ጊሽ “ባይራይ ካሎዛስ ሃሬታና” ጌቴቲዲ ኢርቢቃስ ዮቴቲዴስ። \*  
 13 ሄሲካ “ታ ያቆቤ ዶሳዲስ፤ ኤሳዌ ኢግዲስ” ጌቴቲ ካሴ ሃፌቲዳ  
 ማላ ሃኒዴስ። \* 14 ሂስቲን ኑ ሃዲ አይ ጊኖ? ዎሲ ቤሶንታ አጌራ  
 ማዲ ኤሪዜ? ሙሌካ ማዲ ኤሬና። 15 ዎሲ ሙሴስ “ታ ማራና  
 ኮዩዳዴ ማራና፤ ታ ሚሼታና ኮዩዛይስካ ሚሼታና” ጌስ። \* 16 ሄሳ  
 ጊሽ አሲ ኮይዳ ማላ ጊደንታ ዎይኮ አሳ ዳቡራን ጊደንታ ዎሲ  
 ማሪዳ ማላ ሃኒስ።

17 ጌሻ ማፃፋይ ፋሮኔ “ታ ዎልቃይ ኔ ቦላ ቤታና ማላኔ ታ  
 ሱንሲ ቤታ ኡባ ቦላ ዮቴታና ማላ ታ ኔና ሃይሳስ ዴንሳዲስ” ጌስ።  
 \* 18 ሄሳ ጊሽ ዎሲ ማራና ኮዩዛይ ማሬስ። ኢዛ ዎዝና ሙሚሳና  
 ኮዩዛይ ዎዝና ሙሚሴስ። 19 ኢንቴፌ ኢሳዴይ “ሂስቲን ሃኖይ  
 ሄሳ ማላ ጊዲኮ ኑና ሃኖ ጋካናስ አዛስ ዋይሲዜ? ጋሶይካ ኢዛ ሼኔ  
 ዲጋና ዳንዳዩዛይ ኦኔ?” ጋዳ ኔ አይቾንታ አጋካ።

20 ጊዶ አቲን ዎሳስ ዛሮ ዛራ ኢሚዛይ ኔ ኦኔ? “አሴቲዳ ሚሽ  
 ዛሪዲ አሲዳይሳ ኔ ታና አዛስ ሃይሳሶ አሳዲ?” ጊ ኤሪዜ? \*  
 21 ኡርቃ ሜዲዛዴይ ሄ ኡርቃፌ ባጋ ቦንቾስ ባጋ ቃሴ ሙ  
 ሂራይሶ አሶስ ሜዳናስ ኢዛ ሼኔ ጊዴኔ?

22 ዎሲካ ባ ሃንቆ ቤሳናሲኔ ባ ዎልቃ ኤሪሳናስ ኮይዲ ኢዛ ሃንቆ  
 ቆንጨሲዛይታ፤ ዳያናስ ጊጌቲዳይታ ዳይሶንታ አጋጊኮቺ! 23 ኮይሮ  
 ቦንቾስ ጊጊሲዳ ኢዛ ማሮቴስ ቤሲዛይታስ ኢዛ ቦንቾ ዱሬቴሳይ  
 ኤሬታና ማላ ኢዚ አሳናሳ። 24 ሄይጊዳይዴ አይሁዳታ ባጋፌ ሃላላ  
 ጊደንታ አይዛቤታ ባጋፌ ጊዲዳ ኑናካ አሾንታ ሄይጊዴስ።

25 ሆሴዴ ማፃፋን “ታ ዴሬ ጊደንታይታ ታኒ  
 ‘ታ ዴሬታ’ ጋ ሄይጋና፤ ዶሴቶንታይታ

ኢስታ ታ ‘ዶሴቲዳይታ’ ጋዳ ሄይጋና። \*  
 26 ቃሴካ ‘ኢንቴ ታ ዴሬ ዴኬታ’ ጌቴቲ ዮቴቲዳሶን ሄንካ  
 ‘ኢስቲ ዴዎ ዎሳ ናይታ’ ጌቴቲ ሄይጌታና።” \*  
 27 ኢሳያሲካ ኢስራዴሌ ናይታ ጊሽ  
 “ኢስራዴሌ ናይታ ቆዳይ አባ አጩ። ማላ ዳሪኮካ  
 ጉሳቲ ሃላላ አታና።

28 ጎዳይ ባ ፒርዳ ቢታ ቦላ ኤሌ ፒርዳና” ጊ ዮቴዴስ። 29 ሄሲካ

\* 9:12 ሜዴ 25:23 \* 9:13 ሚላ 1:2-3 \* 9:15 ኪሳ 33:19 \* 9:17  
 ኪሳ 9:16 \* 9:20 ኢሳ 29:16፤ 45:9 \* 9:25 ሆሴ 2:23 \* 9:26 ሆሴ  
 1:10



“ዎጋ ጎዳይ ኑስ ዜሬስ አሾንታኮ  
ኑካ ሰዶሜ ካታማ ማላኔ  
ጋሞራ ካታማ ማላ ዳያናሺን” ጌቴቲዲ ካሴ ኢሳያሳ ዱናን  
ዮቲዳይሳ ማላ ሃኒደስ። \*

**ኢስራዔል ናይታኔ ሚሺራቾ ቃላ**

<sup>30</sup> ሂስቲን ኑ አይ ጊኖ? አማኖን ቤቲዳ ሂሎቴስ ዴማናስ  
አይዛቤይ ዳቡሮንታ ዴሚዴስ። <sup>31</sup> ጊዶ አቲን ሂሎቴሳ ዎጋ ካሊዛ  
ኢስራዔል ናይቲ ዴሚቤቴና። <sup>32</sup> ሄሲ አዛስ ሄሳሶ ሃኒዴ? ኢስቲ  
አማኖን ጊዶንታ አሶን ዴማና ካሊዳ ጊሻሳ። ኢስቲካ ዱጴ ሹቻን  
ዱጴቲዳ። <sup>33</sup> ሄሲካ  
“ሄኮ አሳ ዱጴዛ ሹቾ ኢስታ ኩንዲሲዛ ዛላ ሂዮኔ ቦላ ታ ዎሳና፤  
ኢዛን አማኒዛይይ ዮላቴና”  
ጌቴቲዲ ካሴ ጌኤሻ ማፃፋን ፃፌቲዳይሳ ማላ ሃኒደስ።

**10**

<sup>1</sup> ታ ኢሻቶ! ኢስራዔል ናይታ ጊሽ ታ አሞይኔ ታ ሶሴ  
ዎሲዛይ ኢስቲ ዳዮንታ አታናሳ። <sup>2</sup> ኢስቲ ሶሳ ዮሶስ ሚሹቲዛይታ  
ጊዲዳይሳ ታ ኢስታ ጊሽ ማርካታና ዳንዳያይስ፤ ኢስታ ሚሹቴላ  
ጊዲኮ ኤራቴሳን ጊዴና። <sup>3</sup> ሶሲ አስ ሂሊሲዛ አጌ ኤሮንታ አጊዲ  
ባ ሂሎቴሳስ አጌ ካሊዳ አቲን ሶሳ ሂሎቴሳ አጌ ካሊቤቴና።  
<sup>4</sup> አማኒዛ አሳ ኡባ ሂሊሳናስ ኪርስቶሲ ዎጋ ኡባ ፖሊዴስ።

<sup>5</sup> ሙሴይ ዎጋ ባጋራ ቤቲዛ ሂሎቴሳ ጊሽ ኤሪሲሼ “ሃይታ  
ዎጋታ ፖሊ አሲዛዴይ ሃ ዎጋታን ዳና” ጊዛይሳ። \* <sup>6</sup> አማኖን  
ቤቲዛ ሂሎቴላ ቃሴ ሂዘጌስ “ኔ ዎዘናራ ፑዴ ሳሎ አኔ ኬዛናይ?  
ጎፓ” ሄሳሶ ጉሲ ኪርስቶሳ ሳሎፕ ዱጌ ሃ ዎሳና ጉሳ። <sup>7</sup> ዎይኮ “  
‘ዱጌ ጪማን አኔ ዎዳናይ?’ ጎፓ!” ሄሲካ ኪርስቶሳ ሃይቆፕ ቡሮ  
ዴንሳና ጉሳ።

<sup>8</sup> ጊዶ አቲን ቃላይ አይ ጊዜ? “ቃላይ ኔ አቻን ዴስ።” ኔ  
ዱናኒኔ ኔ ዎዘናን ዴስ። ኑኒ አማኖ ጊሽ ሳባኪዛ ቃላይ ሃይሳ።

<sup>9</sup> ኔኒ ኔ ዱናራ “ዮሱሲ ጎዳ” ጋዳ ማርካቲኮ ሶሲ ኢዛ ሃይቆፕ  
ዴንሲዳይሳ ኔ ዎዘናን ኔ አማኒኮ አታና። <sup>10</sup> ኔኒ ሂላናይ ዎዘናን  
አማኒኮኔ አታናይ ኔ ዱናራ ማርካቲና። <sup>11</sup> ጌሻ ማፃፋይ ጊዛ  
ማላ “ኢዛን አማኒዛይ ወራካ ዮላቴና።” \* <sup>12</sup> አይሁዳታ ጊዶኒኔ  
አይዛቤታ ጊዶን ዱማቴላ ዴና፤ ኢሲ ጎዳይ ኡባስካ ጎዳ፤ ኢዛ  
ዎሲዛይታ ጉጂ አንጄስ። <sup>13</sup> “ጎዳ ሱንስ ሄይጊዛይቲ ወራካ አታና”  
ጌቴቲ ጌሻ ማፃፋን ፃፌቲዴስ።

\* 9:29 ኢሳ 1:9 \* 10:5 ሌዌ 18:5 \* 10:11 ኢሳ 28:16

14 ሂስቲን ኢዛ አማኖንታይቲ ኢዛ ዎዝጊ ዔይጋኔ? ቃሴ ኢዛ ጊሽ ሲዮንታ ዲሼ ዎስቲ አማናኔ? ሳባኬይ ባይንዳ ዲሺን ዎስቲ ሲያኔ? 15 ኪቴቶንታ ዎስቲ ሳባካንዴቶ? ሄሲካ “ሚሺራቾ ቃላ ኤኪ ዩዛይታ ዩሲ አይ ማላ ሎዎ” ጌቴቲ ጌሻ ማፃፋን ፃፌቲዳ ማላ ሃኒዴስ። \* 16 ጊዶ አቲን ሲዩዳይቲ ወሪካ ሚሺራቾ ቃላ ኤኪቤቴና፤ ኢሳያሲ “ጎዶ ኑ ዮቲዳይሳ ኦኒ አማኒዴ?” ጊዳ ማላ ሃኒዴስ። \*

17 ሄሳ ጊሽ አማኖይ ቤቲዛይ ዮቲዛ ቃላ ሲዮሳና። ዮቴቲዛ ቃላይካ ኪርስቶሳ ጊሽ ዮቲዛ ቃላፕ።

18 ጊዶ አቲን አሳይ ሲይቤኔሻ? ጋዳ ታ አይቻይስ፤ ቱማፕ አሳይ ሲይዴስ፤ ጌሻ ማፃፋን ፃፌቲዳ ማላ “ኢስታ ቃላይ ቢታ ኡባኒኔ

አላሜ ጋፃ ጋካናስ ሲዮቲዴስ።” \*

19 ታ ቃሴካ አይቻይስ፤ ኢስራዔል ናይቲ ቃላ ኤሪቤቴኔሻ? ኮይሮ ሙሴይ ኢስታስ

“ታ ዴሬ ጊዶንታይታን ታ ኢስታ አሞሲሳና፤

ዩሺ ቆፖንታ ዴሬታን ታ ኢስታ ዩሎቻና” ጊዴስ። \*

20 ኢሳያሲካ ፃላቴሳን

“ታና ኮዮንታይታስ ታ ቤታዲስ፤

ታና አይቾንታይታስ ታና ቆንጨሳዲስ” ጊዴስ። \*

21 ኢስራዔል ጊሽ ቃሴ

“ታስ አዛዜቶንታ ዴሬኮኔ

ታስ ኤኖ ጎንታ ዴሬኮ ኩሜሳ ጋላስ ታ ኩሼ ሚጫዲስ” ጌስ። \*

# 11

ፆሲ ኢስራዔል አሳ ሙሌ ዩጊ አጊቤና

1 ሂስቲን ፆሲ ባ ዴሬታ ዩጊ አጊዴ? ጋዳ ታ አይቻይስ፤ ሙሌካ አጊቤና፤ ታካ ታ ባጋራ ቢኒያሜ ዛሪኬ፤ አብራሃሜ ዜሬስ ጊዲዳ ኢስራዔል አሳ። \* 2 ፆሲ ኮይሮፕ ባ ኤሪዳ ዴሬዛ ዩጊቤና፤ ኤላሲ ኢስራዔል ናይታ ቦላ ሞቶ ያሳኮ ዎስቲ ሺሺዳኮኔ ጌሻ ማፃፋይ ኢዛ ጊሽ አይ ጊዛኮ ኢንቴ ኤሬኬቲ? 3 “ጎዶ! ኢስቲ ኔ ናቤታ ዎዲዳ። ኔስ ያርሺዛሰታካ ላሊዳ። ቃሴ ታኒ ታርካ አታዲስ። ታናካ ዎዳና ጌቴስ” ጊዴስ። \*

\* 10:15 ኢሳ 52:7 \* 10:16 ኢሳ 53:1 \* 10:18 ማዛ 19:4 \* 10:19 ዛሬ 32:21 \* 10:20 ኢሳ 65:1 \* 10:21 ኢሳ 65:2 \* 11:1 ፕሊ 3:5 \* 11:3 1ካዎ 19:10:14

4 ያሲ ኢዛስ “ባዓሌ ጌቴተዛ ኤቃስ ጎይኖንታይታ ላፑን ሺ አስ ታኒ ታስ አሻዲስ” ጊ ዛሪዴስ \* 5 ሄሳ ማላካ ሃዲ ሃ ዎዴዛንካ ያሳ ኪያቴላን ኢስራዔሌ አሳፑ ዶሬቲ አቲዳ ጉሳቲ ዴቴስ። 6 ሂስቲን ሄሲ ያሳ ኪያቴላን ጊዲኮ አሳ አሶን ጊዴና። አሳ አሶን ጊዲዳኮ ያሳ ኪያቴላ ኪያቴስ ጊዴና።

7 ሂስቲን አይ ጋኔ? ኢስራዔሌ ናይቲ ሎዔሲ ኮዩዳይሳ ዴሚቤቴና። ያሳን ዶሬቲዳይቲ ጊዲኮ ዴሚዳ። ሃንኮ አቲዳይታ ዎዝናይ ሙሚዴስ። 8 ካሴ “ኢስታ አይፌይ ዌሎንታ ማላ፣ ኢስታ ሃይሳይካ ሲዮንታ ማላ ያሲ ሃኖ ጋካናስ ኢስታስ ዶሬሲዛ አያና ኢሚዴስ” ጌቴቲ ጌሻ ማፃፉን ፃፊቲዳ ማላ። \* 9 ዳወቴይካ “ኢስታ ማዳይ ኢስታ አይኪዛ ናርፃኔ ያርዴ፤

ኢስታስ ዲጲዛዘኔ ቂፃቴ ጊዴ።

10 ኢስታ አይፌይ ዌሎ፤ ጎዜቶ፤ ኢስታ ዞኮይ ሜርናስ ኩኖ” ጊዴስ።

**አይዛቤቲካ አታና**

11 አኔ ቃሴ ታ ዛራ አይቻይስ፤ ኢስራዔሌ አሳይ ናምዓንሶ ኩንዴሳፊ ዴንዴኔ? ዴንዳና። ሃራፑካ ኢስራዔሌ ናይታ ቃናቲሳና ጊሽ ኢስታ ሞሮ ጋሶን አቶቴላ አይዛቤታስ ጋኪዴስ። 12 ጊዶ አቲን ቃሴ ኢስታ ሞሮይ አይዛቤታስ አንጆ ጊዲዴስ። ኢስታ ኩንዴሳካ ቃሴ አይዛቤታስ አንጆ ጊዲኮ ኢስቲ ሲሚ አቲዳኮ አይ ማላ ጊታ አንጆ ጊዳንዴሺን!

13 አይዛቤቶ! ታ ኢንቴስ ዮታይስ፣ ታ አይዛቤታስ ኪቴቲዳዴ ጊዲዳ ጊሽ ታ አሶዛ ሚናዳ ፖላና። 14 ሄሲካ ታ ባጋ አሳቲ አሞዛና ማላ ዴንፎሳዳ ኢስታፊ ጉሳ አሳታ አሻናስ ኡፋይሳ አሳይስ። 15 ያሲ ኢስታ አጊዳ አይዛቤቲ ያሳራ ጊጊኮ ያሲ ኢስራዔሌ ናይታ ዛሪዲ ኤኪዛ ዎዴ ኢንቴስ አዘ ሃናና ሚሳቲዜ? ሄሳ ጉሲ “ሃይቆፕ ዴንዲዴስ” ጉሳ ማላ።

16 ኮይሮ ቡኪሶይ ሎዎ ጊዲኮ ሃንኮ ኢዛፕ አሴቲዛይስ ወሪካ ሎዎ ጊዴስ። ሄሳሳካ ኢሲ ሚሳ ፃጶይ ሎዎ ጊዲኮ ሃንኮ ኢዛ ቦላ ዲዛ ሃጋቲካ ሎዎ ጊዴቴስ። 17 ኬሳ ማታን ዲዛ ዎጋራ ሚሳ ሃጋታ ማላቲ ኢንቴ ሜቂ ዎዲን ሃንኮ ዎራን ዲዛ ዎጋራ ሚሳታ ሚሳቲዛ አይዛቤቲ ኢንቴ ኪቾሳን ጊዲዲ ኢንቴ ሃሮኔ ኢንቴ አንጆ ሻኪ ኤኪዛይንታ ጊዲኮ፤ 18 ሄይታ ሄ ሜቂ ዎዲዳ ሃጋታ ቦላ አቶሬቶፋ። ኢንቴ ኢስታ ቦላ አቶሬቲኮ ቃሴ ሃኖ ዎዝናን ዎሲቴ። ሄ ሚሳ ቶኪዳይ ኔና ጊዳካ። ሚሳይ ኔና ቶኪዴስ አቲን።

\* 11:4 1ካዎ 19:18 \* 11:8 ዛሬ 29:4፤ ኢሳ 29:10

19 ሂስቲኮ “ሄ ሃጋቲ ሜቂ ዎዲዳይ ኑኒ ኢስቲ ኪቾሳን ጌላና ማላሳ” ጎንታ አጌኪታ። 20 ቱሙ ጊዴታ ሺን ኢስቲ ሜቂዳይ አማኖ ፓጩፔ ዴንዲዳይሳና። ኢንቴ ቃስ አማኖን ኤቂዴታ። ባቤቴ አቲን አቶሬቶፍቴ። 21 ምሲ ኮይሮፔ ዲዛ ሃጋታስ ሚሼቶንታዴ ጊዲኮ ኢንቴስካ ሚሼቴና።

22 ሄሳ ጊሽ ምሳ ኪያቴሰኔ ኢዛ ሜንዬ ኢታቴላ አኔ ዪላ። ኢዛ ሜንዬ ኢታቴላይ ኩንዲዳይታ ቦላ። ኢዛ ኪያቴላይ ቃሴ ኢንቴ ኢዛ ቃዴቴላ ጋርሳን ዲዛ ዎዴ ጋካናስ ባላላ። ሄሲ ባይንዳ አጊኮ ኢንቴካ ቃንዬታና። 23 ኢስቲ አማኖንታ ሚኒ ኤቂዳሶፔ ሲሚኮ ካሴ ባሶ ሲሚ ጌላና። ምሲካ ኢስታ ዛርሲ ጌልላና ዳንዳይስ። 24 ኢንቴ ባዞ ዎጋራ ሚላፌ ቃንዬቲዳይቲ ካሴ ኢንቴ ሜዴቴላፌ ጊዶንታ ሎዎ ሚላን ኢንቴ ጌላና ዳንዳይኮ ኮይሮፔ ባ ሜዴቴላ ሃጋታ ጊዲዳይቲ ሄይቲ ካሴ ኢዛ ቦላ ዲዛ ዎጋራ ሚላን ሲሚ ጌሎይ ኢስታስ ዋኒ ሃኔኔ?

**ኢስራዔል አሳይ ወሪካ አታና**

25 ታ ኢሻቶ! ኢንቴ ጨንጫ አስ ጊዲዳይሳ ኢንቴስ ሚሳቶንታ ማላ ሃይሳ ጊዶ ፁራ ዮዎዛ ኢንቴ ኤሮንታ አታና ማላ ታ ኮዩኬ። ሄሲካ አይዛቤታፔ ሜይጌቲዳይቲ ወሪ አማኖና ጋካናስ ኢስራዔል ናይታ ዎዝናይ ሙሚዴስ። 26 ሄሳ ጊሽ ኢስራዔል ናይቲ ወሪካ አታና። “አሺዛዴይ ዒዮኔፔ ያና፤ ያቆቤፔካ ኢታቴስ ዲጋና። \* 27 ታኒ ኢስታ ናጋራ ወርሳ ዳይሲዳፔ ጉዬ ታ ኢስታራ ጫቆን ጌሊዛ ቃላይ ሄሳ” ጌቴቲዲ ካሴ ጌሻ ማፃፋን ፃፌቲዳ ማላ ሃኒዴስ። \*

28 ኢንቴስ አይዛቤታስ ሚሺራቾ ቃላይ ጋካና ማላ ኢስራዔል ናይቲ ምሳን ኢዬቲዳ አስ ጊዲዳ። ጊዲኮካ ካሴ ዶሮ ማላ ጊዲኮ ባ አዋታ ባጋራ ኢስቲ ዶሴቲዳይታ። 29 ምሲ ዶሪዳፔኔ ባ ኪያቴስ ኢሚዳፔ ጉዬ ባ አሲዳ ሚሻን ሲሚዲ ሞዴቴና። 30 ኢንቴካ ካሴ አዛዜቶንታይታኮ! ኢስቲ አዛዜቶንታ ኢዪን ሃዒ ኢንቴና ማሪዳይሳሶ፤ 31 ምሲ ኢንቴና ማሪዳ ጌዶን ኢስቲካ ማሬታና ማላ ሃዒ አዛዜቶንታይታ ጊዲዳ። 32 ምሲ ወርሲካ ማራናስ አሲ ወሪካ አዛዜቶንታ ማላ ጎርዲዴስ።

**ምሳ ሳቦ**

33 ምሳ ዱራቴላይ፥ አዶ ኤራቴላይኔ ኢዛ ኤራቴላይ አይ ማላ ጨማ! ኢዛ ፐርዳይ አይ ማላኮኔ ፓጩቴና። ኢዚ አዲዳ ጌዶይካ ኤራቴና። \* 34 “ጎዳ ዎዝና ኤሪዳይ እኔ? ኢዛስ ዞሬ ኢሚዳይ

\* 11:26 ኢሳ 59:20 \* 11:27 ኤር 31:33-34 \* 11:33 ኢሳ 55:8

አኔ? <sup>35</sup> ያሲ ዛሪ ኢማና ማላ ኢዛስ ታልዔ ኢሚዳይ አኔ?” ጌቲቲ ሃፌቲዳ ማላ። \*

<sup>36</sup> ዉሪካ ኢዛፔ፥ ኢዛን፥ ኢዛሳ፤ ኢዛስ ቦንቾይ ሜርናፕ ሜርናስ ጊዶ! አሚን። \*

# 12

## ያሳስ ቤሲዛ ዴዎ ያርሾ

<sup>1</sup> ሄሳ ጊሽ ታ ኢሻቶ! ኢንቴ አሳቴሳ ጊሽኔ ያሴ ኡፋይሲዛ ዴዎ ያርሾ አሲዲ ኢንቴ ሺሻና ማላ ታ ኢንቴና ያሳ ቃዴታን ያሳይስ። ሄሲካ ዎዝናማ አሳ ማላ ኢንቴ ያሳስ አሲዛ አሶ። <sup>2</sup> ሎዎ፥ ኡፋይሲዛዘኔ ኩሜስ ጊዲዳ ያሳ ሼኔይ አዛኮኔ ኢንቴ ፓጩ ኤራና ማላ ኢንቴ ቆፋን አራዲዲ ላሜቲቴ አቲን ሃይሳ አላሜ አሳ ሚሳቶፕ።

<sup>3</sup> ኢንቴስ ያሲ ኢሚዳ አማኖ ማላ ኢንቴርካ ኢንቴና ፓጩ ሄሊቴ አቲን ሃዲ ዲዛይሳፌ ቦላራ ኢንቴና ዶቂሲ ዪሎንታ ማላ ታኒ ታስ ኢሜቲዳ ያሳ ኪያቴሳን ኢንቴና ኢሳ ኢሳ ዞራይስ።

<sup>4</sup> ኑፔ ኢሲ ኢሲ አሳስ ኢሲ አሳቴሳ ቦላ ዳሮ ቢሊቴቲ ዲዛ ማላ ሄይቲካ ሄ ቢሊቴቲ ኢሲ ማላ አሶ አሶንታይሳሶ፤ <sup>5</sup> ሄሳሶካ ኑኒ ዳሮታ ጊዲ ኡቲዲ ኪርስቶሳን ኢሲ አሾ፤ ኑኒ ኢሶይ ኢሳስ አሾ። <sup>6</sup> ኑስ ኢሜቲዳ ኢሞታ ማላ ዱማ ዱማ ኢሞቴሲ ዴስ። ኢሳዴስ ቡሮፔ ሃናናዝ ዮቶ ጊዲኮ ኢዛዴስ ኢሜቲዳ አማኖ ማላ ዮቶ። <sup>7</sup> አሲ ማዲዛዴይ አሲ ማዶ፤ ታማርሲዛዴይካ ታማርሶ።

<sup>8</sup> ዞሪዛዴይ ጊዲኮ ዞሮ፤ ባይንዳይታስ ኢሚዛዴይ ጉጂ ኢሞ። አይሲዛዴይ ሚኒ አይሶ። ማሪዛዴይካ ኡፋይሳን ማሮ።

## ሲቆ

<sup>9</sup> ኢንቴ ሲቆቴሲ ቆዴፔ ቆሞን ጊዶፓ። ኢታ ጊዲዳይሳ ዉርሲካ ኢዲቲ። ሎዎ ጊዲዳይሳራ ኢሲፌ አይኪቴቴ። <sup>10</sup> ኢንቴ ኢንቴ ጋርሳን ኢሶይ ኢሳራ ኢሻታ ማላ ሎዔሲ ሲቆቴቴ። ኢሶይ ኢሳ ባፔ አሲ ቦንቾዛይታ ጊዲቴ። <sup>11</sup> ጎዳስ አሳና አያናን ፀጌቲዛይታ ጊዲቴ አቲን ሄሳ ሄ ሚኖቴሳፌ ጉዬ ጎፕቴ። <sup>12</sup> ሂዶታን ኡፋይቲዛይታ ጊዲቴ፤ ሜቶ ዳንዳይቴ፤ ያሳን ሚኒቴ። <sup>13</sup> አማኒሼ ዋይቲዛይታስ ኢንቴስ ዲዛይሳፌ ሻኪ ኢሚቴ። ኢማስ ሞኪቴ።

<sup>14</sup> ኢንቴና ቃንጊዛይታ አንጂቴ አቲን ቃንጎናቴ። \*  
<sup>15</sup> ኡፋይቲዛይታራ ኡፋይቲቴ፤ ሙዞቲዛይታራ ሙዞቴቴ።

\* 11:35 ኢዮ 41:11 \* 11:36 1ቆሮ 8:6 \* 12:14 ማቶ 5:44፤ ሉቃ 6:28

16 ኢንቴ ኢንቴ ጋርሳን ዶሴቴላን ዲቴ። ማንቆታራ ኢሲፌቴላን ዳናስ ኮዬቴ ኣቲን ኦቶሬቶሬቴኔ ጨቁቶፍቴ። \*

17 ኦናስካ ኢታ ጊሽ ኢታ ዛሮፒቴ። ኣሳ ኡባ ኣቻን ሎዖ ሚሽ ኦሳናስ ሚኒቴ። 18 ኢንቴስ ዳንዳዬቴኮ ኢንቴ ኢንቴ ባጋራ ኣሳ ኡባራ ሳሮን ዲቴ። 19 ታ ሲቆቶ! ኢንቴ ሃሎ ያሲ ኬሶ ኣቲን ኢንቴርካ ሃሎ ኬሶፍቴ “ሃሎ ኬሳናይ ታና ጌስ ጎዳይ” ጌቴቲ ጌሻ ማፃፋን ፃፌቴዴስ። \*

20 ሃሎ ኬሳናፕ “ኔኒ ኔ ሞርኬይ ጋፊኮ ሚዛ፤ ኢዚ ሳሞቲኮ ኡሻ፤ ኔ ሄሳሶ ኦሲኮ ታማ ቦንቆ ኢዛ ቦላ ኮራሳ” ጌቴቲዲ ጌኤሻ ማፃፋን ፃፌቴዴስ። \* 21 ኢታ ሎዖ ኦሶን ያና ኣቲን ኢታን ያኔቶፋ።

### 13

#### ዴሬ ኣይሲዛይታስ ኣዛዜቴስ

1 ኣይ ኣሲካ ባና ኣይሲዛ ዳናታስ ሃሬታናስ ቤሴስ። ያሳፌ ኢሚቶንታ ዲሽን ዳናቴሲ ዴና። ሃሲ ዲዛ ዳናቲ ያሳፌ ዳናቲዳይታ። 2 ሄሳ ጊሽ ዳና ቦላ ማካሊዳይ ያሳ ዎጋ ቦላ ማካሌስ። ሄ ማካሊዳይቲካ ባ ቦላ ፒርዳ ኤሄቴስ። 3 ዴሬ ኣይሲዛይቲ ኢታ ኦሲዛይታ ባቢሴቴስ ኣቲን ሎዖ ኦሲዛይታ ባቢሴቴና። ኔ ዴሬ ኣይሲዛይስ ባቦንታ ኣጋና ኮይይ? ሂስቲኮ ሎዖ ኦሳ፤ ኢዚካ ኔና ጋላታና። 4 ኢዚ ኔስ ሎዖ ኦሳናስ ያሳ ኦሳንቻ። ጊዶ ኣቲን ኔ ኢታ ኦሲዳ ጊዲኮ ኢዛስ ባባ። ጋሶይካ ኢዚ ማሻ ጮ ሚላ ጊጊቤና፤ ኢዚ ኢታ ኦሲዛዴ ቃፃያናስ ያሳ ኦሳንቻ። 5 ሄሳ ጊሽ ኢዛ ቂፃቴስ ባቦ ፃላላ ጊዶንታ ኔ ቆፋንካ ዳናቲዛዴስ ኣዛዜታናስ ቤሴስ።

6 ኢንቴ ጊራ ኢሚዛይ ሄሳሳ። ኣይሲዛይታ ሄሳ ሄ ኦሶዛ ቦላ ያሲ ኢስታ ዎሲዴስ። 7 ኢስታፌ ኢሳስ ኢሳስ ቤሲዛይሳ ኢሚቴ። ጊራ ኢማና ቤሲዛይታስ ጊራ ኢሚቴ፤ ቃራፃ ቃንፃናስ ቤሲዛይታስ ቃራፃ ቃንፃቴ፤ ባባናስ ቤሲዛይታስ ባቢቴ፤ ቦንቻናስ ቤሲዛይታ ቦንቻቴ።

#### ዎዴይ ማቲዳ ጊሽ ኢንቴ ጋርሳን ሲቁቲቴ

8 ኢንቴ ጋርሳን ኢሶይ ኢሳራ ሲቁቴሳፌ ኣቲን ኦና ቦላካ ኣጮይ ዶፖ። ኣስ ሲቁዛ ኣሲ ኢዚ ዎጋ ፖሊዴስ። 9 “ላይማቶፓ፣ ዎዶፓ፣ ኣሞቶፋ” ጊዛይቲኔ ሃራ ኣዛዙቲ ዲኮካ “ኣስ ኡባካ ኔ ማላ ሲቃ” ጊዛ ሃኖ ኢሲ ዎጋን ዉሪካ ኩዬቴዴስ።

\* 12:16 ሌም 3:7 \* 12:19 ዛሬ 32:35 \* 12:20 ሌም 25:21-22

\* 10 ሲቆይ አሳ ቦላ ኢታ አሴና፤ ሄሳ ጊሽ ሲቆይ ዎጋ ኡባስ ኩሻ።

11 ሃይሳ ዎዴዛ ጫዲ ዌሊዲ ሄሳ አሲቴ። ሃዲ ሃና ኢንቴ ዲስኮፊ ዴንዲዛ ዎዴ። ኑ ካሴ አማኖፕቴ ሃ ሲሚን ሃዲ ኑስ አቴዛ ዎዴይ ማቴዴስ። 12 ቃማይ አዲን ዎንታና ጊስ። ሄሳ ጊሽ አኔ ኑ ዲማ አሶ ዎራ ዩጊዲ ፖፖ አላ ሚሺ ማይፖስ። 13 ጋላሳራ ሃሙቴዛ ማላ አኔ ዎጋራ ሃሙቶስ። ማጉልሳኒኔ ማሶን ጊዶፖ፤ ላይማ አሞኒኔ ላይማን ጊዶፖ፤ ቃናቴቴሳኒኔ ፓላማን ጊዶፖ። 14 ሄሳ አጊዲ ዩሱስ ኪርስቶሳ ማይዲቴ። አሾ አሞ ፖላናስ ቆፖፍቴ።

14

አሳ ቦላ ፐርዶፋ

1 ኢንቴ ጋርሳን አማኖን ቡሮ ሚኖንታዴ ሺሺ ኤኪቴ አቴን ኢዛ ቆፋ ቦላ ፐርዶፍቴ። 2 ኢሲ ኢሲ አሲ ቤቴዳይሳ ወርሲ ማናስ አማኖይ ዴስ። ቃሴ አማኖን ሚኖንታዴይ አታኪልቴ ሃላላ ሜስ። 3 ቤቴዳይሳ ወርሲ ሚዛዴይ ወርሲ ሞንታዴ ካዶፓ። ሞንታዴይ ቃሴ ሚዛዴ ቦላ ፐርዶፍ። ፖሲ ኡባካ ኤኪዴስ። 4 ሃንኮ አሲዛዴ ቦላ ፐርዲዛዴይ ኔ አኔ? ኢዛዴይ ኩንዲኮ ዎይኮ ኤቁኮካ ጎዳሳ። ጎዳይ ኢዛ ኤሳናስ ዳንዳይዛ ጊሽ ኢዚ ኤቃንዴስ።

5 ኢሳዴይ “ጋላሳታፕ ኢሲ ጋላስ ሃራ ጋላሳፌ አሲዲ ባሲ ዳማ ጋላስ” ጊ ቆፕስ። ሃራ አሲ ቃሴ “ጋላሳቴ ወሪካ ኢሲ ጊና” ጊ ቆፕስ። ኢሲ ኢሲ አሲ ባ ዎዝናን አማኒዳ ማላ አሶ። 6 ኢሲ ጋላሲ ሃራ ጋላሳፌ ዳማሲ ቆፐዛዴይ ኢዚ ሄሳ አሲዛይ ጎዳ ቦንቾስ ጊዲኮ ሚዛዴይካ ጎዳ ቦንቾስ ጊዲ ሜስ። ሚዲ ፖሴ ጋላቴስ። ሞንታዴይካ ጎዳ ቦንቾስ ጊዲ ሙስ አጊሲኔ ፖላስ ጋላታ ኢሜስ። 7 ኑፕ አኒካ ባሲ ዲዛዴይኔ ባፕ ባሲ ሃይቁዛዴይ ዴና።

8 ኑ ዲኮካ ጎዳስ ዶስ። ሃይቁኮካ ጎዳስ ሃይቆስ። ሄሳ ጊሽ ዲኮካ ዎይኮ ሃይቁኮ ኑ ጎዳሳ።

9 ሄሳ ጊሽ ሃይቁዳይታሲኔ ፓፃ ዲዛይታስ ጎዳ ጊዳናስ ኪርስቶሲ ሃይቁዲ ሃይቆፕ ፓፂ ዴንዲዴስ። 10 ሂስቴን ኔ አዛስ ኔ ኢሻ ቦላ ፐርዳይ? አዛስ ኔ ኢሻ ሌቃይ? ኑ ወሪካ ፖላ ፐርዳ ዎምቦራ ሲንስ ሺቆስ ዶስ። \*

11 “ታ ፓፃ ዳይስ። ጉልባቴይ ወሪካ ታስ ጉልባታና። ኢንፃርሲ ወሪ ፖላስ ማርካታና”

\* 13:9 ኬሳ 20:14-15፤ 20:13፥17፤ ዛሬ 5:17-19፥21፤ ሌዌ 19:18 \* 14:10 2ቆሮ 5:10

ጌቱቲ ካሴ ጌሻ ማፃፋን ፃፌቲደሰ። \* 12 ሄሳ ጊሽ ኑኒ ኢሲ ኢሲ ኢሲ ሰሳ ሲንጎሳ ሺቂዲ ኑ አሶ ጊሽ ኢዛስ ዛሮ ኢማና።

13 ሄሳ ጊሽ ኑኒ ኑ ጋርሳን ኢሶይ ኢሳ ቦላ ፐርዳናፕ አኔ ናጌቶስ። ሄሳ አጊዲ ኑ ኢሻስ ዱጴ ጊዲዛይሳ ዎይኮ ኢዛ አይኪዛ ናርፃ ዎሶንታ ማላ አኔ ኑ ናጌቶስ። 14 ታኒ ጎዳ ዩሱሳን አማናዳ ሚዛ ካሳን ቱናይ ባይንዳይሳ ኤራዲስ። ጊዶ አቲን ኢሳዴይ ኢሲ ሚሽ ቱና ጊ ቆፐኮ ሄ ሚሻይ ኢዛዴሲ ቱና። 15 ኔኒ ኔ ኢሻ ሚዛ ካሳ ጊዶን ዱጴ ጊዲኮ ሲቆን ሲሜሬታባካ። ኪርስቶሲ ኢዛ ጊሽ ሃይቂዳ ኔ ኢሻ ኔ ሚዛ ካሳ ጋሶን ዎዶፓ። 16 ኢንቴ ሎዎ ጊዲ ቆፐዝ ሚሽ ኢታ ጌቱታና ማላ አሶፍቴ። 17 ሰሳ ካዎቴሲ ዪሎ አያናን ቤቲዳ ዪሎቴስ፣ ሳሮቴሲኔ ኡፋይሳፌ አቲን ሙሳ ዮዶኔ ኡሻ ዮዎ ጊዴና። 18 ሃይሳሶ ኪርስቶሳስ አሲዛዴይ ሶሴ ኡፋይሴሴኒ አሳ አቻንካ ጋላቴቴስ።

19 ሄሳ ጊሽ ሳሮቴሲ ቤቲዛ አጌኔ ኑኒ ኑ ጋርሳን ሎዎናስ ቤሲዛ አጌ አኔ ኮዮስ። 20 ኑኒ ሚዛ ካሳ ጊሽ ጊዲ ሰሳ አሶ አኔ ላሎኮ። ካሲ ወሪካ ጌሻ። ጊዶ አቲን ሃራ አሳስ ዱጴ ጊዲዛ ካስ ሙሲ ባላ አሶ። 21 ኔ ኢሻስ ዱጴ ጊዲዛዚ ጊዲኮ አሾካ ማናፕኔ ዎይኔ ጫጄ ኡያናፕ ዎይኮ አይ ሚሺካ ኔ አሶንታ አጊኮ ሎዎ።

22 ሄሳ ጊሽ፣ ሃይታንታ ሚሳቲዛ ሚሻታስ ኔስ ዲዛ አማኖይ ኔ ጊዶኒኔ ሰሳ ጊዶን ዴዎ። “ሃይሲ ሊኪኮ” ጊዲ አማኖን ኤኪዳ ሚሻን ባርካ ባ ቦላ ፐርዶንታዴይ ኢዛዴይ አንጄቲዳዴ። 23 ጊዶ አቲን ዎዝናራ ሲዲሼ ሚኮ ኢዚ አማኖን ሞንታ ጊሽ ኢዛ ቦላ ፐርዶቲደሰ። አማኖን አሶንታዚ ወሪካ ናጋራ።

### 15

1 ኑኒ አማኖን ሚኒዳይቲ ሃንኮ አማኖን ሚኖታይታ ሜቶ ቶካናስ ቤሴስ አቲን ኑ ፃላ ኡፋዩቲዛይታ ጊዳናስ ቤሴና። 2 ኑኒ ወሪካ ሃራ አሲ ባ አማኖን ሚናና ማላ ኢዛ ጎዲዛዚኔ ኡፋይሲዛ ሚሽ አኔ አሶስ። 3 ኪርስቶሲ ባና ኡፋይሲቤና፤ ሃራፕካ “አሳይ ኔና ጫዶዳ ጫሻይ ታና ጋኪዴስ” ጌቱቲ ካሴ ጌሻ ማፃፋን ፃፌቲዳይሲ ፖሌቲደሰ። \* 4 ኑኒ ጌሻ ማፃፋታፕ ዴሚዛ ዳንዳያይኔ ሚኖቴሲ ኑስ ዳና ማላ ኮይሮፕ ፃፌቲዳይሲ ወሪካ ኑ ኢዛፕ ኑስ ቲሚርቱ ዴማና ማላ ፃፌቲደሰ።

5 ሚኖቴሲኔ ዳንዳያ ኢሚዛ ሶሲ ኢንቴ ዩሱስ ኪርስቶሳ ካሊሺን ኢንቴስ ኢንቴ ጊዶን አያና ኢሲፌቴስ ኢሞ። 6 ሄሲካ ኢንቴ ኢሲ ዎዝናኒኔ ኢሲ ዱና ጊዲዲ ኑ ጎዳ ዩሱስ ኪርስቶሳ አዎ ሰሳ ቦንቻናሳ።

\* 14:11 ኢሳ 45:23 \* 15:3 ማዛ 69:9



ሚሺራቾ ቃላይ አማኖንታ ደሬታስ ሳባኪቲደስ

7 ሄሳ ጊሽ ሦሴ ኢንቴና ሦሳ ቦንቾን ሞኪ ኤኪዳ ማላ ኢንቴካ ኢሶይ ኢሳ ኡፋይሳን ሞኪ ኤኪቴ። 8 ካሴ አዋታስ ኢሜቲዳ ሂዶታ ቃላ ፖላናስ ሦሳ ቴማቴሲ ኤሬታና ማላ ኪርስቶሲ አይሁዳታስ አሲዛዴ ጊዲዳይሳ ታ ኢንቴስ ዮታይስ። 9 ሄሳሶካ አይዛቤቲ ኢዛ ማሮቴላ ጊሽ ሦሴ ጋላታና ማላ፤ ሄሲካ

“ታ ኔና ደሬ ጊዶን ጋላታና፤  
ኔ ሱንሳስካ ጋላታ ዮስ ዮፃና”

ጌቴቲ ጊሻ ማፃፋን ፃፌቲዳ ማላ። \*

10 ቃሴካ

“አይዛቤቶ!

ኢንቴካ ሦሳ ደሬታራ ኡፋዮቲቴ”

ጌቴቲ ጊሻ ማፃፋን ፃፌቲደስ። \*

11 ናምዓንሶካ

“አይዛቤቲ ኢንቴ ወሪካ ንዳ ጋላቲቴ፤

ደሬይ ወሪ ኢዛ ሳቢቴ”

ጌቴቲ ጊሻ ማፃፋን ፃፌቲደስ። \*

12 ሄሳሶ ኢሳያሳን

“ባ ደሬ አሳ ቦላ ካዎቲዛ ኢሴዮ ናይ ያና።

አላሜ አሳ አይሲዛዴይ ዴንዳና፤

ኢስቲካ ኢዛን ኡፋዮታና” ጌስ። \*

13 ኢንቴ ኢዛን አማኒዛ ጊሽ ሂዶታ ሦሴ ኢንቴናን ኡፋይሴ ናሳ ሳሮቴስ ኩንሶ። ሄሲካ ሂሎ አያና ዎልቃ ሂዶታ ኢንቴስ ዳራናሳ።

አይዛቤታስ አሳንቻ ጊዲዳ ጳወሎሳ

14 ታ ኢሻቶ! ኢንቴ ሎጌቴሳን፤ ኤራቴስ ኡባን ኩሚዳይታኔ ሃራታ ዞራናስ ኤራይ ዲዛይታ ጊዲዳይሳ ታ አዳፌ ሻካ ኤራዲስ።

15 ታ ሦሳፌ ኤኪዳ ኢሞቴላ ጊና ቃሴካ ኢንቴና ቆሬሳናስ ኢሲ ኢሲ ዮታ ፃላቴሳን ኢንቴስ ፃፋዲስ። 16 ሄሳ ሄ ኪያቴሳይ ኢሜቲዳይ ታኒ ሦሳ ሚሺራቾ ቃላ ሃንኮ ደሬታስ ዮታና ማላ፤ ቃሴካ ቁሴ ማላ ጊዲዳ ዮሱስ ኪርስቶሳስ አሳናሳ፤ ሄሳ ጊሽ ሃንኮ ደሬ አሳይ ሂሎ አያናን ዱማቲዲ ሦሴ ኡፋይሴሲዛ ያርሾ ጊዲዲ ሺቃና ማላ አሳይስ።

17 ሄሳ ታኒ ሦሳስ አሲዛ ጊሽ ዮሱስ ኪርስቶሳን ጨቁታይስ።

18 ታ ዮቲዳይሳኒኔ ታ አሲዳይሳን ሃንኮ ደሬ አሳይ ሦሳስ አዛዜታና ማላ ኪርስቶሲ ታናን ጊዲዲ አሲዳዛፔ አቲን ሃራ ሃሳያና ፃሊኬ።

\* 15:9 2ሳሜ 22:50፤ ማዛ 18:49 \* 15:10 ዛሬ 32:43 \* 15:11 ማዛ 117:1 \* 15:12 ኢሳ 11:10

19 ሄሲካ ሃኒዳይ ዊሎ አያና ዎልቃን ማላታታ ባጋራ ሃኒዴስ። ሄሳ ማላንካ ዩሩሳላሜፔ ኢልዋቆሬ ጋካናስ ታ ኪርስቶሳ ሚሺራቾ ቃላ ሳባካዲስ።

20 ሃራ አሲ ካሴ አሲዳሶን ታ ጌሎንታ ማላ ጋዳ ካሴ ኪርስቶሳ ሱንሲ ዊይጌቲ ኤሮንታሶን ሚሺራቾ ቃላ ሳባካናይሲ ታስ አዎ።

21 ሃራፔካ

“ኢዛ ጊሽ ኢስታስ ዮቴቶንታይቲ ኢዛ ቤያና፤

ሲዬ ኤሮንታይቲ ሃሳዓና”

ጌቴቲ ካሴ ጊሻ ማፃፋን ፃፌቲዳ ማላ ሃኒዴስ። \*

22 ሄሳ ጌዶን ታ ኢንቴኮ ቦንታ ማላ ዳሮ ዎዴ ዲጌታዲስ።

**አሮሜ ቤያናስ ጳውሎሳ ጊጌቴስ**

\* 23 ሃሚ ቃስ ታስ ሃን አሶይ ባይንዳ ጊሽ ዳሮ ላይሳታፔ ሃ ሲሚን ኢንቴና ቤያናስ ታ ዳሮ ላሞታዲስ። 24 ሃይሳ ታ ቆፋ ታኒ ኢስፔኔ ቢዛ ዎዴ ፖላናስ ቆፓይስ። ሄራ አዳሼ ኢንቴና ቤያናሲኔ ኢንቴናራ ጉሳ ዎዴ ጋምዓዳ ላሞታ አሲዳ ማላ ኢንቴ ታና ማዳና ጋዳ ሂዶታ አሳይስ።

25 ሃሚ ቃስ አማኒዛይታስ ኢሜቲዛ ማዶ ጊሽ ኤካዳ ዩሩሳላሜ ባይስ። 26 ጋሶይካ ማቂዶኒያኒኔ አካያን ዲዛ ማንቆታ ማዳና ዴንዲዴስ። \*

27 ሃይሳ ሃ ማዶዛ ኢስቲ ባ ዶሳን ኢሚዳይ ኢስቲ አላናስ ቤሲዛ ጊሻሳ፤ አይዛቤቲ አይሁዳታራ ኢሲፌ አያና አንጆ ኤኪዛይታ ጊዲኮ ኢስቲካ ባሲ ዲዛ ቢታ አንጆን አይሁዳታ ማዳናስ ቤሴስ። \* 28 ሄሳ ጊሽ ሃይሳ ሺቂዳ ማዶ ሚሻ ዩሩሳላሜ ኢሚዳፔ ጉዬ ኢንቴ አቻን ታ ኢስፔኔ ባና። 29 ታ ሄ ኢንቴኮ ባሼ ኢንቴስ ኪርስቶሳ አንጆ ኩንሳ ኤካ ባናይሳ ታ ኤራይስ።

30 ታ ኢሻቶ! ታኒ ያሳ ዎሳን ባዌቲዛ ማላ ኢንቴካ ታናራ ባዌታና ማላ ታ ኢንቴና ኅዳ ዩሱስ ኪርስቶሳኒኔ ዊሎ አያና ሲቆን ዎሳይስ። 31 ታኒ ዩሁዳን ዲዛ አማኖንታ አሳ ኩሼፔ አታና ማላኔ ዩሩሳላሜን ዲዛ ታ አሶይካ ሄን አማኒዛይታ አቻን ኤኬታና ማላ ታስ ዎሲቴ። 32 ሄሲካ ያሳ ሼኔ ማላ ሄ ኢንቴኮ ታ ኡፋይሳራ ባና ማላኔ ኢንቴናራ ኢሲፌ ሼምፓና ማላ። 33 ሳሮቴሳ ኅዳይ ኢንቴናራ ኡባታራ ጊዶ። አሚን።

16

ሳሮካ

\* 15:21 አሳ 52:15 \* 15:22 አሮ 1:13 \* 15:26 1ቆሮ 16:1-4 \* 15:27 1ቆሮ 9:11

1 ከንኪራዎሴ ዎሳ ኬላን አሲዛ አማኔቲዳ ሚቼዮ ፔቤኖ ኢንቴስ ሃዳራ ጋይስ። 2 አማኒዛ አሳስ ቤሲዛ ሞኮ ኢንቴ ኢዞ ጎዳ ሱንሳን ሞኪ ኤካና ማላኔ ኢዛ ኢንቴፌ ኮዩዛ አይ ሚሻንካ ኢንቴ ኢዞ ማዳና ማላ ታ ኢንቴና ቆፊሳይስ።

3 ካሴ ታናራ ጎዳ ዩሱስ ኪርስቶሳስ ኢሲፌ አሲዳ ጲርሲቁላሲኔ አቂላስ ታ ሳሮካ ጋሲቴ። \* 4 ኢስቲ ታ ጊሽ ሃይቃና ጋካናስ ባና አሲ ኢሚዳ፤ ታና ሃላላ ጊዶንታ አይዛቤታ፤ አማኒዳይቲካ ኢስታ ጋላቴቴስ። 5 ኢስታ ኬላን ዲዛ አማኒዛ አሳካ ሳሮ ጊቴ። ኢሲያፔ ኮይሮ ኪርስቶሳን አማኒዳ ታ ሲቆዛ ኤጴኔያሴ ሳሮ ጊቴ። 6 ኢንቴስ ዳሮ ዳቡሪዳሮ ማራሞ ሳሮ ጊቴ። 7 ታናራ ኢሲፌ ቃጅቲዳ አንዲራቆኔኔ ዩኒያሴ ሳሮ ጊቴ። ሄይታንቲ ሃሞሬታ ጋርሳን ሎዎ ሱንሳራ ዲዛይታኔ ኪርስቶሳ ታ፤ ካሴ አማኒዳይታ። \*

8 ታኒ ጎዳ ባጋራ ዳሮ ሲቂዛ ጲልያያኔ ሳሮ ጊቴ። 9 ኪርስቶሳ አሶ ታናራ ኢሲፌ አሲዛ ኢሮባኖኔኔ ታ ሲቂዛ ሴንግኬካ ሳሮ ጊቴ። 10 ኪርስቶሳን ኢዛ አማኖይ ፓጩቲዳ ጋላቴቲዳ ኤዌሴኔሴስ ታ ሳሮካ ጋሲቴ። አርሲግባሎሶ አሳስካ ታ ሳሮካ ጋሲቴ። 11 ታ ዳቦ ሄሮዲያና ሳሮ ጊቴ። ጎዳን ዲዛ ኒሪቃሶሶ አሳ ሳሮ ጊቴ።

12 ጎዳን ጊዲዲ ሚኖቴሳን አሲዛ ማጫሳታ ቲሮፊሞኖኔ ሂሮፊሞኖ ሳሮ ጊቴ። ጎዳስ አሶን ዳሮ ዳቡሪዳሪስ ኪርስቶሳን ታኒ ኢዞ ሲቂዛ ሃርሲዲስ ታ ሳሮካ ጋሲቴ። 13 ጎዳን ዶራቲዳ ፍሮኔስ፣ ታሲኔ ኢዛስ አዮ ጊዲዳሪስ ታ ሳሮካ ዮቲቴ። \* 14 አስቁርኔሲ፣ አፊላሶኔሲ፣ ሄሮሜኔሲ፣ ጳዊሮባኔሲ፣ ሄሮማኔሲኔ ኢስታራ ዲዛ ኢሻታ ኡባታስ ታ ሳሮካ ጋሲቴ። 15 ፊሌንኔስ፣ ዩሲያስ፣ ኔሪያሲኔ ኢዛ ሚቼይስ ሄሳሶካ አልያኔስ፣ ኢስታራ ዲዛ አማኒዛይታስካ ታ ሳሮካ ጋሲቴ።

16 ኢሶይ ኢሳ ዩሪ ዩር ኤኪዲ ሳሮኬቲቴ። ኪርስቶሳን አማኒዛ ዎሳ ኬላ አሳይ ወሪካ ኢንቴና ሳሮ ጊስ።

17 ታ ኢሻቶ! አሳ ጋርሳን ሻኬቴሲ ሚዲዛይታ፤ ኢንቴ ታማሪዳ ቲሚርታ ኤኮንታ ኢያን ኢንቴስ ጳጴ ጊዲዛ አሳታ፤ ኢንቴ ናጌቲቴ። 18 ሄይታንታ ማላ አሳቲ ዩሱስ ኪርስቶሳስ አሲዛይታ ጊዶንታ ባ ቃንሳ ካሳ ጊሽ አሲዛይታ። ሹጎ ቃላራ ሃሳያኒኔ ዎዝና ኪያ አሳታ ባሌሴቴስ። 19 ኢንቴ ሚሺራቾ ቃላስ አዛዜቲዛይታ ጊዲዳይሳ አሲ ወሪ ሲይዴስ። ሄሲካ ታና ዳሮ ኡፋይሲዴስ። ጊዲኮካ ኢንቴ ሎዎ ሃኖስ ጨንጫታ ቃሴ ኢታ አሶስ ኤያታ ጊዳና ማላ ታ ኮያይስ። 20 ሳሮቴሳ ጎዳይ ሃላዔ ኤሶን ኢንቴ ቶሆ ጋርስ አሲ ዲንጩራሳና።

\* 16:3 ሃሞ 18:2 \* 16:7 ዩኒያሴ ኢሲ ኢሲ ጊሻ ማገፋቲ ዮሲያ ጊቴስ።

\* 16:13 ማር 15:21

ጎዳ ዩሱስ ኪርስቶስ ኪያቴሲ ኢንቴናራ ጊዶ።

21 ታናራ ኢሲፌ አሲዛ ሂምቶሲ ቃሴካ ታ ዳቦ ሉቂዮሲ፥ ኢያሶኔይኔ ሱሲጳዊሮሲ ኢንቴና ሳሮ ሳሮ ጌቴስ። \*

22 ሃይሳ ኪታ ሃፊዳይ ታኒ ዪሪዊሮሲ ኢንቴና ጎዳ ሱንሳን ሳሮ ጋይስ።

23 ታኒኔ ሃይሳን ዲዛ ኩሜሳ ዎሳ ኪሳ አሳይ ሞኪ ኤኪዛ ጋዩዮሲካ ኢንቴና ሳሮ ጌስ፤ ካታማ ሚሻ አይኪዛ ኤሪስዎሲኔ ኑ ኢሻ ቆዓዊሮሲ ኢንቴና ሳሮ ጌቴስ። \* 24 ጎዳ ዩሱስ ኪርስቶስ ኪያቴስ ኢንቴናራ ኡባታራ ጊዶ። አሚን።

25 ታኒ ዮቲዛ ሚሺራቾ ቃሳይ ዩሱስ ኪርስቶስ ጊሽ ዮቴቲዛ ኪታይኔ ቤኒ ዎዴፔ ዶሚዲ ቆታን ጋምዲዲ ሃዲ ቃሴ ቆንጨዳ ቱማ ፀራ ባጋራ ኢዚ ኢንቴና አማኖን ኤሳናስ ዳንዳዮስ። 26 ሃዲ ቃሴ ሃይሲ ቱማይ ቆንጨዴስ። ሜርና ዎሳ አዛዞን ወሪካ አማኒዲ አዛዜታና ማላ ናቤታ ማፃፋ ባጋራ ዴሬቲ ወሪካ ኢዛ ኤራና ማላ ሃኒዴስ።

27 ኢዚ ሃላላ ኤራ ጊዲዳ ጎዳስ ዩሱስ ኪርስቶስ ባጋራ ሜርና ቦንቾይ ኢዛስ ጊዶ። አሚን።

\* 16:21 ሃዋ 16:1 \* 16:23 ሃዋ 19:29፤ 1ቆሮ 1:14፤ 2ጊዎ 4:20

## አራሳ ጫቆ ማገፋ ጋሞላ

### New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

